

**A·CHIKNI  
PORAANI KI·TAP**

**LINDRID D. SHIRA**

**GARO HILLS BOOK EMPORIUM**  
**HAWAKHANA TURA**

Acc. No. 8765

Class No.      Book No.

Author Shing Lindind D.

Title Achikeni Poraiane  
Kitap.

## DISTRICT LIBRARY

EAST GARO HILLS DISTRICT

WILLIAM NAGAR

Accession No. \_\_\_\_\_

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

**Help to keep the book fresh and clean**





# **A·CHIKNI PORAIANI KI·TAP**

**V ARO VI**

**LINDRID D. SHIRA**

**LECTURER,**

**Department of Garo, Tura Government College, Tura**

**GARO HILLS BOOK EMPORIUM**

**Hawakhana, Tura-794001**

**West Garo Hills, Meghalaya**

*Published by :*

**Sushil Kr. Das**

**Hawakhana,**

**Tura-794001**

**West Garo Hills, Meghalaya**

**Seventh Edition 1995**

**Price Rs. 20.00**

*Printed at*

**Nabapress Pvt. Ltd.**

**66, Grey Street,**

**Calcutta-6.**

## AGANCHENGANI

A·chik bi·sarangna bang·a ki·taprangko sena nangkuenga. Da·o je ki·taprangko jakkalengachim, uarangoni bang·batan an·chingna ka·sagipa Missionaryrangni see donanggiparang aro pagitchamrangni seanggiparangsang on·a.

A·chikkuchi poraina gita text bookko Dr. Miles Bronson 1867-68 bilsirango sechengaha. Ua chasong·oni a·bachenge da·o adita king ki·taprang chon·chongipa classrango poraigiparangna on·kataha. Indiba chasongni kri, gital gital ki·taprangko bi·sarangna nanga, jedakode uamang chasongni kri uidapanirangko man·gen. Uandake bang·a ki·taprangkon A·chik bi·sarangna nangengkua.

Chengonin Class V aro Class VI -o poraigipa A·chik bi·sarang Garo subject-o Class IV na tarigipa ki·tapkosa poraitokenga. Da·alonaba iana text book tarigipa darangba dongkuja. Iandake angni ka·sara A·chik bi·sarangna nanganiko nika anga ia chongipa ki·tap kingsako tariaha. Man·adipet Class V aro Class VI ni gadangna krae iako tarina jotton ka·aha, aro anga bebera·a ian gadangni kri poraigiparangna uamangni uina nanganirangko on·gen.

Ia ki·tapo Meghalaya A·songni jatrangni dakbe-walrang, jakgitelanina krenggiparang, cholon-bewalko rikanina dakchakani ong·nakgipa seani-rang, jatko dilgiparangni kamrang, bolrangna ka·sana skianirang, mande mandeska baksa meli-nangrime janggi tanganirang aro uandake ma·manti nambata janggi tanganina gamchatgipa seanirangko iano man·gopatna jotton ka·aha. Unbaksa namnamgipa aro mingtogipa poedorang-koba donataha.

Ia ki·tapko badinge lapko man·na sejaha ; indiba Isol je bang·gija changa-sapaniko angna on·paaha, uko jattangni namgnina aro jattangko chuatanina jakkalpana miksongesa iako neng·bee seaha.

Ia ki·tapko sena angko didigipa pilak angni ka·sara ripengrang, skigiparang aro gipinrangko anga mitela. Angni neng·e kam ka·e amsokgija ong·engon aro iako matchotatna amjaengon angko ka·dimeatgipa aro didigipa angna Isolni on·gimin jikgipa Mrs. Bethsida Ch. Momin (Zeldama) koba anga mitelna gualja.

A·chik jat silroroangchina aro A·chik bi·sarang lekka porao silroro-namroroangchina angni sika aro bi·a.

Dated Tura,  
17th May, 1988

Lindrid D. Shira



## JA'PANG KATTARANG

<i>Lessonrang</i>	<i>Ja'pang Kattarang</i>	<i>Jak</i>
Lesson 1	Hans Christian Anderson	1
Lesson 2	Be'enni Bakrang	7
Lesson 3	U Tirot Singh	11
Lesson 4	Bebeni Ripok	18
Lesson 5	Gipinko Dakchakani	22
Lesson 6	Do'sia	28
Lesson 7	Rasongni Kimbriona	32
Lesson 8	U Kiang Nangbah	34
Lesson 9	Mikbokani	38
Lesson 10	A'chikrangni Lekka-poraichengani	43
Lesson 11	Snigipa Continent	48
Lesson 12	Ka'sagipa Ma'a	51
Lesson 13	Na'a Cha'unabe	53
Lesson 14	Ferdinand Magellan	58
Lesson 15	Behdeinkhlam	61
Lesson 16	Edward Jenner	65
Lesson 17	A'chikrangni Sko Sotani	70
Lesson 18	Ringring Ganti	76
Lesson 19	Pygmy Jat	77
Lesson 20	Humayun	81
Lesson 21	Meghalaya	85
Lesson 22	A'gilsakko Daka	87
Lesson 23	Gitelni Katta	90
Lesson 24	Nongkrem Chrokani	92

<b>Lesson 25</b>	<b>Nosari-Bandari</b>	<b>94</b>
<b>Lesson 26</b>	<b>Namgijagipa Mandede</b>	<b>98</b>
<b>Lesson 27</b>	<b>Sonaram R. Sangma</b>	<b>100</b>
<b>Lesson 28</b>	<b>Jajongona Songreani</b>	<b>104</b>
<b>Lesson 29</b>	<b>Manggisiko Soatgija Rakkiani</b>	<b>109</b>
<b>Lesson 30</b>	<b>Songsulna Ka'saani</b>	<b>111</b>
<b>Lesson 31</b>	<b>Bidani Chimikko Ringgen</b>	<b>116</b>
<b>Lesson 32</b>	<b>Gandhini Salgipeng Africao</b>	
	<b>Kam Ka'ani</b>	<b>118</b>
<b>Lesson 33</b>	<b>Burung-Bolgrimni Gamchata</b>	<b>124</b>
<b>Lesson 34</b>	<b>Chu</b>	<b>129</b>



## LESSON 1

### HANS CHRISTIAN ANDERSON

---

Golpo agananiko pilakan knana namnika. A'gilsako golpo aganna changbatsranggiparangoni saksara Hans Christian Anderson ong'achim. Uko "Prince of Story-tellers" ba "Golpo agangiparangni raja" ine mingsingpilachim. Kangalbegipa jutta sike janggi tangaigipa mandeni depante a'gilsako mingsingako man'gipa aro man'e cha'begipa mande ong'gen ine sawa chanchisogenchim ! Ian ong'na amgijani ong'ja ine Hans Anderson uni janggi tangauichi mesokaha.

Hans Anderson Denmark a'songni Odense minggipa songo 1805 bilsio atchiaha. Uni pagipa jutta sike janggi tangachim. Ua depantena noksarangko mesoke golpo aganrongachim. Ua kal'anirangkoba tarie depantena on'aha aro kal'anirangko mande dake tarie chroat-re'atani-rangko tarie on'aha. Hans bilsni on'g'aipition pagipa sipaio napna draako man'aha aro sipaio

dongmitingon ua sae siaha. Segipani siani ja'mano Hansni ma'gipa gipin me'asako bia ka'taiaha.

Hans mande namen daknangjachim. Uni gingting gingtongrengreng dake dal'achim aro unan uko ka'dingatna tarigipa mande gita nikpilaiachim. Uni bimang chol'rengreng dake changroachim. Chola dal'a aro an'tangna meligijako ganrongachim aro ja'aoara bolniko tarigipa ja'koprangko ganskaa-chim. Indakgipa mandeko nikon pilakan ka'dingna sikako chakchikna man'jachim. Noko depante saksanchim aro noksulni bi'sarang darangba unbaksa rorimjachim. Bi'saskarang pilakan uko chonnike aro jongkaiesa rotokaiachim.

Skangni salrango rajarang an'tangtangni raotrangko an'tangtangoniko maikoba dabina chol on'rongachim. Hans rajani nokona re'angaha. Ua rajana gitrangko knatobee ring'aha aro poedorangko nambee minge on'aha. Raja kusi ong'beaha aro una maiko dabigen Hanso sing'aha. Hans ka'dongbee aganaha, "Anga dakmesokaniko sena aro dakmesokanio bak ra'pana sika."

Raja Hansni indake bi'aniko knaon una namen ka'sachakaha. Rama, changroa aro rama re'on tangbingbangaigipa bi'sa maikai mingsingbegipa dakmesokanio bak ra'pana man'gen, ian ong'na amgijani ong'achim. Uni gimin raja una indine ku'patiaha, "Na'a songchi re'angpile nang'pa gita jutta sike janggi tangbo."

Hans nokchi re'angpilaha ; indiba noko

dongkamnade ong'jachim. Ua an'tangni paisa chimonggipa dikteko dokprue paisarangko ra'e nokoni ong'kate a'songni skotong songjinma Copenhagen-ona re'bapilaha. Ua uano dakmesokanio bak ra'e kam ka'pana jotton ka'beaha, indiba darangba uko ra'chakjaha. Ja'mano saksak dakmesokanio mongsonggipa bakko ra'gipa una ka'sachakaha aro indake uko dakmesokanio bak ra'ani bidingo skie ra'china skul ge'saona watataha. Skuloba pilakan uko chonniktokaiachim; indiba ua ia pillakna gisik on'gija miksongatangona sokna kamtangko gisik nangbee ka'aha.

Hans tangka man'ani cholrangko dakna jotton ka'beoba chu'sokna man'jaha. Ja'mano je on'tisa tangka dongpaa uko ra'e Professor Siboniona re'bae uo git ring'aniko skie ra'na chanchiaha. Ua ia changoba chu'soktaijaha, maina ua dal'dromiting ong'ani gimin ku'rang tik ong'jaha. Indiba ua kal'anirangko chrokat-re'atnade changskabeachim aro indake uchin bang'a ripengrangko man'aha. Uni ripengrangoni saksara rajani demechik ong'achim aro uan Hansni cha'ani aro ganachinanina tangkarangko on'rongaha. Hans ua tangkarangko poedo ki'taprangko brena aro dakmesokanirangko ninasa jakkalskarongaha.

Hans janggi tangna namen tikkelnangaha. Uni nokni manderang uko gipin kamko am'e ka'china aganaha, indiba uo dal'bata miksongani dongani gimin ua gipin kamrangna gisik on'jaha.

Ua bang'a poedorang, dakmesokanirang aro golpo-rangko seaha; indiba darangba uarangna gisik on·jaha. 1835 bilsio ua an·tangni segimin golpo-rangko chapa ka·gipa mande saksana chapa ka·china on·aha. Ua ia ki·tapna gisik on·brejaha aro ua ki·tapna bang·gija manderangsang gisik on·aigen ine chanchie dongengachim. Indiba ua ki·tap nakatahaon chona dal·a pilakan uni golpo ki·tapna gisik nangtokbeaha aro ua ki·tap tikpilajaha. Hans da·o rang·sanan mingsingako man·aha aro ua man·e cha·begipa mande ong·baaha.

Bilsio kolatchisnina Hans a·gilsakna namnam-begipa golporangko on·aha. Uni golporango ka·dinganirang bang·oba, uarang mandeni janggi tanganiko tiktak mesokachim. Bang'a uni golporangan an·tangni bi·samitingo chol gri ong·ani, kal·stekako man·ani aro neng·skime janggi tanganiko nangchapbatachim.

Hansni golporangko bang'a mongsonggipa a·gilsakni ku·sikrangona pe·skaaha. Bang'a rajarang aro seson ka·giparang uko an·tangtangni a·songona okamataha aro una mandera·ani on·anirangko on·aha. Uni chonmitingo songtango uko daknang-jadugaani gimin "Orangutang" ba "Makkre Dal·gipa" inesan chonnike bimung donachim; indiba uko mingsingahaon aro ua man·e cha·begipa mande ong·bahaon, a·songtangni manderang uko "Our World Famous Orangutang" ba "Chingni

A'gilsako Mingsinggipa Makkre Dal'gipa" ine mingskaaha.

A'gilsak gimik Hansko mingsinga aro mandera'a ja'manosa songtang Odenseni manderang una mandera'ani kamko dakaha. Indake uni songtangona re-bapilon songjinma gimikkon chakkirangchi teng'suataha aro manderang bil'chamrangko ra'e re'jome uko rama dilaha. Bilsa sotbongana skang uni watanggipa songjinma, jeon uko chonnika, ka'dingsteka aro sola-inachim, uko dingtang bimango aiao inmanpile rimchaksoskaaha ! Bi-samit-ingo rasong be'ani biap dal'ahaon rasongni bidamni biap ong'skaaha ! Manderang gitrangko ring'e una rasong on'e inchroaha. Una aganna somoi on'on, uni ka'saan aro mitelpilan gapgipa ka'tongoni "Isol aro Mandena, angni mitela aro ka'saani" ingipa kattarangsang ong'kataha.

Hans 1875 bilsini August 4 tariko ripengtangni noko sae siaha. Ua ruute saahaoba, saksan ong'jaha ; ma'ina salantian ripengskarang aro uko namnikgip-arang una dongtimaha.

# 1. Sing'anirang :—

- (a) Hans Christian Anderson bano aro basako atchiaha ?
- (b) Uni pagipa mai kamko ka'e janggi tangachim ?
- (c) Hansni be'en bimang maidake ong'achim ?

- (d) Songtangni manderang bi-samitingo uko maikai jakkalaha ?
- (e) Ua rajaona maina re-angaha ?
- (f) Raja una maiko aganataha ?
- (g) Hans janggi tangna gita maimai kamrangko karna jotton ka-aha ?
- (h) Uko maina mingsingna a-bachengaha ?
- (i) Ua uni golporangko maio nangchape seaha ?
- (j) Uko daknangjana badine bimung dontokaha aro ua mingsingako man-on badine mingskaaha ?
- (k) Songtangni manderang uko maikai rimchaksoaha ?

2. Bangbanggiparango katta jikseko gapatbo :—

- (a) Mingsing-\_\_\_\_\_ ; (b) Sika-\_\_\_\_\_ ;
- (c) Tari-\_\_\_\_\_ ; (d) Ka-ding-\_\_\_\_\_ ;
- (e) Gana-\_\_\_\_\_ ; (f) Ku-sik-\_\_\_\_\_ ;
- (g) Mitel-\_\_\_\_\_ ; (h) \_\_\_\_\_-bimang.

3. Hans Christian Anderson maikai a-gilsako mingsingbegipa mande ong-baaha, kan-dike sebo.

4. "Mandeo sikani dongode cholba donga" ine aganme-apaani baditana kingking Hansni janggi tanganio kakket ong-a, talatbo.





Chonnikatjok nachil gingtingni gaorako,  
 Bil-ting bil-ting jegrikaha u'mang ja'mano.

6. Raprapari rang-ki rang-dang inwatjok ku'sik,  
 "Dongjasrangma na'simango sakantion gisik ?  
 Na'simangni kamrangko talatgipa sawa ?  
 Be'n bimango dongachimma ku'sik gita  
 jawa ?"
7. "Durbetchok nikpajama angni neng-engako,  
 Niatboda na'simangko chilenggipa ja'ko,"  
 Aganatjok ka'grak ja'ba ka'sin ka'dimgija,  
 "Neng-enggipa anggitade darangba dongja."
8. Uandake sakantian kamko ka'tokode,  
 Sawa mancha roaigipa donga indiode ?  
 Indakemung uamanga tom'e melaaha,  
 Be'n bimango rogipako tale sandiaha.
9. Sing'angaha sakantion, "Roaigipa na'ma ?"  
 Ja'manosa nikchotaha roaigipa Bikma ;  
 Sakantian agantokjok roana manenge  
 Ku'sa agangija bikma dongaijok nione.
10. Sakantian manengaha, "Roari dongaibo,  
 Ong'jaode kam gimikkon galgopgen uibo,"  
 Uandaken sakantian kamtangko galgopjok,  
 Bikmakosan kamrangko ka'china aganjok.

11. Jakba dangdikgija roaha jaktome,  
Mikronbani nigija dongaijok mikchipe ;  
Gingsikgipa gingting datketjok kilapchi,  
Knagipa nachil kapingjok ba·rachi.
12. Agangipa ku·sik dongaiaha jrip,  
Re·gipa ja·ba jitjaha dongdip ;  
Sakantian ka·gija kamko dontokaha,  
Ja·manoa sakprakpraknan sintia sokbaaha.
13. Dangdikgipa jak de·chaonan man·jajok ;  
Gingsikgipa gingtingba ochipetangpiljok ;  
Niksenggipa mikronba mikklongklong dakjok ;  
Knagipa nachilara nadipchangangtokjok.
14. Agangipa ku·sik gam·aton man·jajok ;  
Re·gipa ja·ba ga·jiton gitchiljok ;  
Indake sakantian sintitokpilaha,  
Ja·manosa bikman' kamko u'mang uiaha.
15. Uandake sakgipinni sintitokmitingon,  
Parakatjok bikmaba an·tang kamko unon ;  
"Oe, beben, na·simanga kamko ka·tokenga,  
Indioba ang' griode tangna amtokgenma ?"
16. "Be·n bimango mongsonggipa dongja angna  
agre,  
Sakantian kamko ka·a angna neng·skime ;  
Indakemung uamanga kamko ka·piltaina  
Jotton ka·piltaiaha bikmako alduna.

17. Mande sakantina Isol patijok chu'gimik,  
 Be'en bimang, mikron aro uiani gisik.  
 Uni gimin sakgipinko miknenggija ong'na,  
 Ku'mong nangrimgrikanichi kamko  
 ka·tokchimna.

— Walter M. Sangma, Tura.

## RANTA KA'ANIRANG 2

### 1. Sing'anirang :

- (a) Be'enni bakrang maina jegriktokaha ?
- (b) Uarang sao mai dosko man'aha ?
- (c) Uarang an'tangtangan ja'mano mai duko garaktokaha ?
- (d) Uarang ja'mano kamtangtanganoniko mai skianiko man'aha ?

2. Be'enni bakrangni jegrikani gimin ku'akmachi (Prose order) sebo.

3. Ia poedoko poraie mai skianiko na'a man'a chanchiatangko sebo.

4. Ia poedoni pod 8 aro pod 9 ko nang'ni gisikoniko sebo.

5. Bangbanggiparango katta jikseko gapatbo .

- (a) Ku'sik-\_\_\_\_\_ ; (b) Jegrik-\_\_\_\_\_ ;

- (c) Be'en-\_\_\_\_\_ ; (d) Rang·ki-\_\_\_\_\_  
 (e) Ja·man-\_\_\_\_\_ ; (f) Mikneng-\_\_\_\_\_.

6. Ka·mao on·sogimin kattarangko jakkale sentence rikbo :

- (a) Korok nanga ; (b) Dongknapja ; (c) Rang·ki-rang·dang ; (d) Ka·grak ; (e) Gitchila ; (f) Sinti-do·pilgima ; (g) Sinti-ninia ; (h) Sinti-do·oldua ; (i) Jawa.



### LESSON 3

### U TIROT SINGH

Pilak jaton jatna aro a·songna ka·sae janggitang-tangko on·chakgipa manderang donga. Tirot Singh Khasi jatonni ong·a aro uaba an·tangni janggiko jatangna on·chakaha. Ua ka·donggipa aro bilakgipa mande ong·achim. English manderangchi dokor ka·aoniko aro ma·manti namgija dake sinjetaoniko jakgitel ong·atna uan dakgrikdilaha. `Ia uni nambegipa kamnan da·alo Khasirang uko jatni matgrik aro a·songna ka·sagipa ine mandera·enga.

Tirot Singhni atchiani chongmotgipa tarikko uijaoba, indiba ua 1801 oni 1805 bilsirangni gisepo atchina nanga ine chanchichipa. Bi·samitingo ua Mawmluh minggipa songo dongbataha aro unon ua dal·atakoba man·aha. Raja pantena krakra bi·saonin uko name taribaaha. Dakgrikani, sason ka·ani, lekka poraiani, dakarikani aro indakgipa raja panteni skie ra·na nanggipa pilakon ua name tariatako man·e namrorobaaha.

Tirot Singh changrobea ong·jachim. Ua meter 1 centimeter 50 mangsan changroaigenchim. Uni be·enni bakrang namtokoba jak samsade bi·saonin an·ma goka ong·a gita dakachim; indiba ian uni bilko komiatjaha aro uko on·tisaba bilgridapatjaha. Uni be·en namen ma·ketani gimin ua mande namen bilaka aro mangrakachim. Raja pantena krakra uni be·en chananga aro mikkim gnangachim. Raja aro dilgipana kraen uni gisikba namen ta·rakachim.

Khasirang sason ka·gipa ba rajako Syiem minga. Nongkhlaw a·kingni Syiem, Konrai Singh, 1826 bilsio sion, Tirot Singh uni pal Syiem songako man·aha. Ua namjabegipa aro kenbegnigipa somoio Syiem songako man·aha. Uandaken a·bachengon ua bang·a neng·nikanirangko' chagrongna nangaha. Uni songnok Burmese aro Englishrangna kenna nangbeengachim aro ua bilakgipa bobilrangko dakgrikna altua kam ong·chongmotjachim.

Englishrangni sason ka·ani Indiani salaram a·dokona sokbaaha. Uamang Indiani chonchon-

gipa songnokrangni meligrikgijaniko aro bilgria-  
 niko chol ra'e songnoksani ja'mano songnoksako  
 ra'e ja'mano India gimikkon an'tangtangna  
 ra'srangaha. Ua somoimitingo Khasi Hills Kamrup  
 aro Sylhetni gisepgriko dongachim. Ia songnok  
 ge'gnini gisepo chubegipa a'bri dongpengani gimin  
 biap damsaoi damgipinona re'grikna aro bading-  
 chiwalgrikna namen neng'ani ong'achim. Uni gimin  
 jedakode mongsongbate badingchiwalanio altugen,  
 uandake Kamrup aro Sylhetko nangdimatna Khasi  
 Hills gita rama daksotna Englishrang chanchiaha.  
 Ua somoio mingsinggipa David Scottan Indiani  
 salaram jolko sason ka'ani bidingo nirokna donako  
 man'engachim. Ua Syiemrang baksa ripeng dake  
 uamangko ia kamna ropchengaha. Khasirang kusi  
 ong'e Scottni bi'a gita an'tangtangni a'songko rama  
 daksotna on'aha.

Khasirangni Syiemrang an'tangtangni a'dokko  
 indake rame daksotna on'ahaon rang'sanan  
 Englishrang kamko a'bachengaha aro rutgija  
 somoion kamrang adhanan bate chu'sokangaha.  
 English officerrang, Lieutenant Baddingfield aro  
 Lieutenant Burlton, Nongkhlawo donge kamrangko  
 nirokaha. Indiba ruutgijan Englishrang baksa  
 Khasirang kajia nangaha. Tirot Singh Scott baksa  
 Bardwar a'kingni bidingo meligrikjaha. Unbaksa  
 Tirot Singh baksa melibegipa Syiem U Bor Manick  
 aro Myllemni Syiem East India Company baksa  
 Desh Dimurua biapni bidingo kajia ong'e English-

rang baksa dakgrikna tariaha. Indake Khasirang baksa Englishrangni dakgrikani 1829 oni 1833 ona ong'aha.

Dakgrikani a'bachengon English officer sakgni Lieutenant Burlton aro Lieutenant Baddingfield ka'saninggija so'otako man'aha. David Scottba ua somoio Nangkhlawon dongengachim; indiba ua jenten Cherrapunjiona waljatchio kate jokaha. Khasirang da'o an'tangtangni bobil Englishrangko dakgrikna Nongkhlawni pante Syiem Tirot Singhkong seokaha aro uan uamangko pilak dakgrikanirango dilaha.

Scott Cherrapunjio donge bakbak English sipairangko watate bobil dakgipa Khasirangko bamatchina kobor on'ataha. Captain Lister bakbakan bilakgipa English sipai dolsako rimbite Khasirangko rikbaaha aro bang'a biaprangon uamangko amro-robaaha. Indiba Gauhationide Kamrup districto golmal bang'engani gimin sipairang re-baningna man'jaha.

Tirot Singh Englishrangko dakgriksonasan tariai-jaha, indiba uamangko Indiani salgro-salaram a'dok gimikonikon a'rikatsrangna da'o chanchiaha. Uandaken ua Assamese, Garo, Boro, Singpho aro Tibetan jatrangko an'tang baksa jak on'pachina mol'molataha.

Englishrang bobil dakgipa Khasirangko bamatna ta'raken kam ka'aha. Captain Lister Nongkhlawo



napna man·ningjaha, maina uano Khasirang simang-tangmang Englishrangko dakgriksoaha. Ua dakgrikanio me·chikrangba bak ra·paaha. Ja·mano Lieutenant Vetch Gauhationi re·bae Nongkhlawona sokeaha. Tirot Singh sambajolo donggipa gipin jatrangko an·tang baksa Englishrangko dakgrikechina okamataha. Uko Ahom raja Chandra Kanta sipairangko watate dakchakaha. Unbaksa A·chikrangba una chake Englishrangko dakgrikaha. Indiba skia man·gipa aro bilakgipa English dolko amna man·jaha. Bon·kamao Nongkhlaw kningatako man·aha aro Tirot Singh uko wate katna nangaha.

Tirot Singh da·o burungo donge Englishrangko dakgrikskaaha. Changni chang Englishrang uko nangrimgrikaniko dakna okamaha, indiba ua Englishrangna ka·dongchakna man·jae an·tangni dongnuram biaponi ong·katbajaha.

Englishrang da·o Khasi Hillsona rama dakbagiparangko chipchangaha aro indake cha·anirang sokbana man·jaha. Da·o Khasirang ma·manti dukrangko man·aha. Uamang cha·ani man·jae bol bite aro ja·dilirangko cha·na nangoba aro mitamrang okgimu chakna nangoba an·tangtangko bobilna bame on·jaha. Oktangtangna chanchie uamang jatangko aro jakgitelaniko paljaha.

Bilsi bri bilonge dakgrikani ja·mano Tirot Singh Englishrangni nangrimgrikanina okamako bebera·e an·tangni dongnuram biaponi ong·katbaaha. Ua indake ong·katbaon Englishrang uko rang·san

rim·gittangaha. Uko Captain H.Inglis rim·e Dacca songjinmaona ra·angaha.

Tirot Singh Dacca songjinmani patokon 1834 ·bilsini March 29 tariko siaha. Ua Englishrangna bame dongna ku·rachakode uko Nongkhlawni Syiem ong·e dongepilchina watatpilna am·achim; indiba ua indakesan aganchakaha, "Anga sildeng·gnang raja ong·ana batede koedi ong·e patoko sina kusi ong·bata."

Tirot Singhko gisik ra·na uni bimangko tarie West Khasi Hills districtni Mairang songjinmao songe donaha. Ua da·alo dongjahaoba uni nambe·gipa jatna ka·saani kamrang uni manderangni ka·tongo jringjrotna donggen.

## RANTA KÁ·ANIRANG 3

### 1. Sing·anirang :

- (a) Tirot Singh basako atchiaha ?
- (b) Tirot Singhni be·en bimang maidake ong·achim ?
- (c) Ua basako badia a·kingni Syiem ong·aha ?
- (d) David Scott sawa ?
- (e) Maina ua Khasi Hillsko rama daksotna am·aha ?
- (f) Tirot Singh aro Englishrang maidake bobil ong·grikaha ?

- (g) Tirot Singhna sawarang chakaha?
- (h) English officerrangoni sawarang dakgrikanio so'otaka man'e siaha ?
- (i) Tirot Singh maikai rim'gittanga man'aha ?
- (j) Ua bano siaha ?
- (k) Uni bon·kamgipa kattarang maidake ong'a-chim ?

2. Tirot Singhni janggi tangani gimin aro uni kamrangni gimin kan'dike sebo.

3. Ka'mao on'sogimin kattarang baksa meligipa ku:jikserangko gapatbo :—

- (a) Bobil-\_\_\_\_\_ ; (b) Dakgrik-\_\_\_\_\_ ;
- (c) A'king-\_\_\_\_\_ ; (d) Bilak-\_\_\_\_\_ ;
- (e) A'song-\_\_\_\_\_ ; (f) Tari-\_\_\_\_\_ ;
- (g) Burung-\_\_\_\_\_ ; (h) Nirok-\_\_\_\_\_ .



## LESSON 4

### BEBENI RIPOK

---

Russia a'songo saksa me'chik bi'sa Lodgine minggipa' dongachim. Ua bi'sa intalan tol'e aganrongachim. Adita dal'ahaon uni ma'a paa uko skulona watataha. Basakoba ua bi'sa skulchi re'na aratode maiba maiba kattarangko pa'sike agane dongrikrongaiachim.

Lodgine noko ma'a paana tol'e aganaiasan ong'ja, ua skuloba bi'saskarangna aro skigipanaba salantian tol'e aganrongachim. Skigipa uni tol'e aganani-rangko rim'a man'e uko namatna-gita tol'e aganani-na pangnan uko manengrongaha. Skigipa je cholchiba ua bi'sani tol'aniko namatna am'oba man'jaha.

Salsao skigipa Lodgineni ma'a paani nokona re'ange aganaha, "Na'simangni demechik pangnan tol'e aganrongenga; aro anga uko namatna jotton ka'beoba man'jaha. Na'simang da'onin uko namatna

kam ka'jaode ja'mano ua na'simangna dal'bea dukko ra'bagen."

Lodgineni ma'a paa duk man'bee skigipana aganchakaha, "Oe skigipa, ua bi'sa pangnan ching-naba tol'e aganronga; chinga uko jegita namatna kam ka'obà uko namatna man jatelaha".

Unon skigipa uamangna aganaha, "Na'simang ua bi'sako namatchong'motna sikode, indide chol mingsa gnang. Satya Wizard minggipa saksa sam man'begipa ia a'songni salaramchi a'ningni noko donga. Uchi re'ange aro ua bi'sako rimange samko bi'ebo".

Salsao skigipani agana gita Lodgineni ma'a paa demechikko rime Satya Wizardni dongramona re'angaha. A'ningni ramako re'ang'mitingo adita andalachim; indiba Satya Wizardni nokona sokeon pilakchin teng'suchipaha. Satya Wizard uamangko niksoarin uamang maina miksonge re'baaha, uko uisoaha. Ua Lodgineko an'tangni sepangona re'bachina aganaha. Me'chik bi'sa sepangona re'bahaon, ua an'tangni chongipa bakosoni gamchatbegipa ripokko bikote bi'sani gitoko patataha. Lodgine ua ripokko man'na namen kusi ong'beaha. Indiba ua maina ua gamchatbegipa ripokko on'atengachim, uko uijaha. "Na'a ua ripokko bilsisana ganna man'a; indiba bilsisani ja'mano anga uko re'ange nigen aro uko-ra'bapilgen", ine Satya me'chik bi'sana aganataha.

Lodginena ripokko ganatani ja'mano ma'a paa Satyako salam ka'e re'bapilaha. "Satyani samde ripok mangmangsan ong'aia" ine uamang ramao golpo ka'rorobaaha aro uehi demechikna mai namgniko ra'bana man'gen, mamung ka'donga grisa uamang re'bapilaha.

Salsao Lodgine ripokko gane skulchina re'angaha. Ripengskarang ua nitobegipa ripokko nike aiao inmanbeaha ! Uamang uo sing'aha, "Na'a ia ripokko banoniko man'aha?" "Apa angni skulchi re'na bimchipani gimin ia gamchatbegipa ripokko angna boksis on'aha", me'chik bi'sa aganchakaha. Iako aganarion uni gitoko gangipa ripok bolni ripok pil'aha. Unon bi'suskarang ripokni rang'san dlingtang ong'aniko nike aiao inmanaha aro jinma ka'dingtokaha. Jinmani mikkango an'tangna indak-gipa obosta ong'ani gimin kratcha'an baksa duk ong'a gnanng ua agantaiaha, "Satya Wizard bilsisana ganchina ia ripokko angna on'ataha." Iako aganarion ripok rang'san skang gitan apsan ong'pilitaiaha. Iako niktaion uni ripengskarang bate bate uko kal'steka gnanng ka'dingtokaha. Ua kratcha'a amchakjae changsatai aganaha, "Apa iako angni atchiani salo boksis on'asa." Indake aganon ua ripok a'aona saljojona nangpile jauaha. Iako nikon ripengskarang una ka'dingstekani pal ka'sachake aganaha, "Na'a bebeko aganjringbo. Unon indak-gipa kratcha'anirang nang'ona sokbajawa."

Unon me'chik bi'sa grape aganaha, "Anga

pangnan tol'e aganrongani gimin tol'e aganman'aia. Ia ripokko Satya Wizard bilsisana ganchina angna on'aha ; bilsisani ja·mano ua iako ra'epilgen." Indake ua bi'sa kakketko aganahaon ua ripok skang gitan gamchatgipa ripok ong·piltaiaha. Untalan ua bi'sa tol'e aganjaha, maina tol'e aganani una badita duk aro kratcha·aniko ra·baa ua name tale da'o uiaha.

Bilsisani ja·mano Satya Lodgineni nokona re·bae nion ua ripokko nangjaha ine nike ra·angpilaha.

## RANTA KA·ANIRANG 4

### 1. Sing·anirang :

- (a) Lodgine badia a·songoni ong·achim ?
- (b) Ua maidakgipa me·chik bi'sa ong·achim ?
- (c) Satya Wizard sawa ?
- (d) Me·chik bi'sako maina Satya Wizardona rimangaha ?
- (e) Satya maiko me·chik bi'sana on'ataha ?
- (f) Maia me·chik bi'sako bebeko agangipa ong'ataha ?

2. Lodgine sawa? Ua maidakgipa me·chik bi'sa ong·achim? Ja·mano ua maidake namgipa bi'sa ong·pilaha? Golpoo pangchake kattatangchi sebo.

### 3. Katta jikserangko bangbanggiparango gapatbo :

- (a) Bi'sa-\_\_\_\_\_ ; (b) Golpo-\_\_\_\_\_ ;
- (c) Wata-\_\_\_\_\_.

4. Ka-mao on-sogipa kattarangni dingtanggrikaniko mesokna sentence rikbo :

(a) Ama ; am'a (b) Chinga ; ching'a. (c) Rama ; ram'a ; ram-a. (d) Rinanga ; rim'anga. (e) Mik-songa ; mangsonga.

## LESSON 5

### GIPINKO DAKCHAKANI

---

Changsao an-tangnasan chanchiaigipa mande saksa dongachim. A-gilsako uni dakna nanggni kamara an-tangni janggiko tange rakkinasan ong'raia ine ua kimkim bebera-achim. Ua kangal ong-be-achim, aro badita rake kam ka'a inditan kangal ong-batroroachim.

Uo dedrang sak chigni gnangchim; aro indake dal-begipa nokdangko aldumittangna una namen neng-ani ong-achim. Ua je gita rake kam ka-oba dedrangko aldurakjaha. Salsao uni noko jikgipa aro dedrang sak chignina agre mamungba dongjaha ine ua nikaha. "Angna dedrangko on'eba uamangko alduna mamung cholkoba on'gijaniara mairongpile



Isolni kakketgija ong'ani," ua Isolko matnange aganaha. "Anga saksa uigipa mandeona re'ange ia angna ong'enga obostarangni gimin sing'e nigen" ua chanchiaha. Indaken ua an-tangni rasongko am-na re'angaha.

Uigipa mandeara chel-begipa bolgrimni mite nokosa dongengachim, aro uchi re'angnara una namen kenbegni aro neng-beani ong'achim. Ramao ua ut mangsako grongaha. Uni janggilo gamchat-gipa gamrangko boja gni gata gnangchim.

"Bachi re'enga ?" ut uko sing'aha.

"Angni rasongko nina," ua mande aganchakaha.

"Angni rasongni giminba sing'e nipabone. Anga badinggiparangoni brange bils chi'gnina kingking ia bojarangko ra-bite iarangko galna man'jae brangjojoenga," ut skime aganaha.

"Aiao! Mairongpile dukni ong'a Atcha anga sing'e nigen" ine agane ua re'angkuaha. Adita re'angon ua apalbegipa chibimaona sokeaha. Uano dal-begipa gorial mangsa dongachim

"Angko chi nalsachi ra-batatbo," mande gorialko mol-mole aganaha.

"Ra-batgen ; indiba na'ara bachi re'enga ?" Gorial mandeo sing'aha.

"Angni rasongko nina," mande aganchakaha.

"Angni rasongni giminba sing'pabone," gorial aganaha. "Anga bils chi'gnina kingking angni okningo wa'al kamenga gita saaniko man'enga.

Indake saknaako man·ana batede sion nambatgenchim ine anga basakoba basakoba chanchiman·pila," ua agankuaha.

"Atcha", ine agane ua mande re·angkuaha. Ua re·angkuoa adita dikgipa bolgrimo matcha mangsani saknabee tengtoe tuengako grongdikeaha. Ua matchani samtangtango skango uni chike cha·gimin manderangni gamrangan gapaiachim.

"Bachi re·enga ?" matcha mandeo sing·aha.

"Angni rasongko nina," mande aganchakaha.

"Angni rasongni giminba sing·bajolpabone," matcha mol·molaha. "Angni ja·o bu·su bu·aha aro bilsa chi·gnina saknae tengtoe dongenga," matcha duk man·bee aganaha.

"Atcha, sing·e nigen," ine agane mande joljol re·angaha.

Ja·mankitiko ua an·tangni miksonga biapona sokeaha. Uni am·baenggipa uigipa mande·ara mite nokosa saksan dongengachim. Songregipa mandeni an·tangona re·baako nike uigipa mande sing·soaha.

"Maina re·bara ?"

"Angni rasongko nina ; maina ango dedrang sak chi·gni gnang, aro angara kangal ong·dugaani gimin uamangko aldurakjaenga."

"Indide na·a an·tangnasan chanchiaiakon, na·a gipinrangni giminba chanchibo: unon na·a an·tangba namgipa rasongko man·gen," uigipa mande aganchakaha.

"Ramao angni grongbagipa utni rasongara maidake ong·gen ? Uni janggilo jribegipa bojarang boja gni gnang, aro ua bilsa chi·gnina uko ra·bite neng·skimenga," mande utni giminba aganaha.

"Utmi janggilni bojarangko ra·onbo; unon nang·na aro una namgen. Maina skangnin indake dakja ?" uigipa mande manenga gnang aganaha.

"Chibimao donggipa gorialni rasongara maidake ong·gen ? Uni okningo wa'al kama gita ding·engani gimin ua bilsa chi·gnina sae dongenga," mande gorialni rasongkoba sing·e aganaha.

"Una samko kanbo; unon nang·na aro una namgen. Maina skangnin indake dakja ?" uigipa mande manenga gnang agantaiaha.

"Bolgrimo amgija tue dongenggipa matchani rasongara maidake ong·gen ? Uni ja·ao bu·su bu·e ua bilsa chi·gnina biljime uno tue dongenga," mande matchani giminba aganaha.

"Uni ja·aoni bu·suko okbo; unon nang·na aro una namgni ong·gen," uigipa mande agantaiaha.

Unon ua mande matchaona re·ange uni ja·aoni bu·suko okaha. Matchani saknaani rang·sanana ka·sinaha, aro ua kusi ong·beaha. "Ia angni sambao donggipa pilak gamrangko ra·angtokbo; uarang nang·na dakchakani ong·gen," matcha kusi ong·bee aganaha.

Uni ja·mano matchani on·atgipa gamrangko boe ua gorialona re·angaha. Gorial uko niksoe sing·aha,

"Angni rasongni giminna maiko aganaha? Angni okningo wa'al kama gita saa da'alonaba namku-jaenga." Mande mamungkoba aganchakgija joljol gorialona re'ange una saani samko kanaha. Gorial samni ka'ako chakna man'jae okningo donggipa gamchatgipa ro'ongko el'buataha. Rang'sanan gorialni okningo wa'al kama gita saenggipa ka'sinangaha, aro indake ua an'sengpilaha. Ua kusi ong'a aro mitelpila gnanng mandena aganaha, "Ia gamchatgipa ro'ongko ra'angbo: anga nang'ko man'e cha'gipa ong'atgen." Mande ua ro'ongko ra'e kusi ong'bee re'angaha.

Unikoa mande utni dongram biapchina re'angaha. Ut neng'a amjae bolo dengdale dongengachim. Chel'aonin ua mandeni re'bapilengako niksoe ka'dongsoa gnanng sing'soaha, "Angni rasongara maidake ong'gen? Anga ia bojarangko galna man'jaode ruutgijan signok!" Mande mamungkoba aganchakgija joljol re'ange utni janggilo donggipa bojarangko ra'onaha. Unon rang'san utni be'en ritchengaha aro uni neng'aba namangaha. Ut kusi ong'bee aganaha, "Ia katomrangko ra'angbo. Uarang sona ong'a, aro na'a uchin man'e cha'gipa ong'gen."

Mande kusi ong'bee bang'a gamrangko boe nokchi re'angaha. Ua da'o man'e cha'batgipa manderangoni saksa ong'aha. Ua gamrangko an'tangni dedrangna سوالا, aro bang'akon sakgipinrangni namgnina jakkalaha. Ua untal

an·tangnanangmang chanchijaha, indiba gipin-rangni namgnina aro uamangko dakchake janggi tangnasa chanchibataha. Indake gital janggi tangniko tangon ua kusi ong·gipa mande ong·aha.

## RANTA KA·ANIRANG 5

### 1. Sing·anirang :

- (a) Mande maina Isolko matnangaha ?
- (b) Ua bachi maiko am·na re·angaha ?
- (c) Ramao ua sawarangko grongaha ? Uarangni obostarangara maidake ong·achim ?
- (d) Uigipa mande maiko dakchina skiataha ?
- (e) Ua kangalgipa mande maikai man·e cha·gipa ong·baaha ?
- (f) Janggi tangao ua mai skianiko man·aha ?

2. Ia golpoo janapgipa kangalgipa mandeni janggi tangani maikai dingtangaha kattatangchi sebo.

3. Na·a golpoko poraie an·tangna mai skianiko man·gen ?

## LESSON 6

DO'SIA

---

Do'siani orto uan "Do'o Sia" ba "Do'oko So'otani". Uni miksonganiara Kristian ong'gijagipa A'chik me'a aro me'chik jik se ong'grikanina do'oko rasote kamal miteko okame kamko chu'sokata. Kristian-rang-jik se ong'grikanina bia ka'a, indiba Kristian ong'gijagipa A'chikrang do'siskara.

Aganritingbaani gita chengo man'e cha'begipa mande Songdu Simera minggipa dongachim. Uo nitobegipa demechik saksa gnanachim. Demechik me'tra sokahani gimin una se am'ani da'o somoi ong'aha. Ua somoio Songduni demechikna kragipa panteara Dira Diderani depantesan dongaiachim. Dira Dideraba namen man'e cha'achim, aro uni depanteba namen pante chanangachim. Uandaken Songdu demechikna Dira Diderani depanteko sing'na re'angaha. Me'asani pagipaba mamungkoba sandigija joljol depanteko chawari wataha. Chawari rimangen chawarigipade jikni aro niotang obiteni cha'anikode cha'panan man'jaha, Songdu Simerani manderang na'tokkosa gittang cha'aiachim. Una miko song'e on'na inoba uamango me'dik sam'dik aro wa'al dongjani gimin man'jachim. Indaken mi song'giminkosan cha'aigipa chawaride na'tok gittangkode cha'pana man'jae antisamangna okgimu

dongaha. Cha'ani ringani gri antisa dongahaon ua  
 panteni be'en ram'sisi ram'dengdeng dakangaha,  
 aro indake uni chananggipa mikkang ong'siangaha.  
 Ja'mano ua okkria amchakjae pagipani nokona  
 katbapilaha. Depanteni antisani ja'manon nokona  
 katbapilani gimin pagipa Dira Didera aiao inmane  
 depanteo mai a'selni gimin katbapilaha, uko  
 sing'aha. Unon depante aganchakaha, "Mikon  
 chikon song'e chanen on'ja; salanti na'tok gittang-  
 korara on'a. Ukoara angara cha'nan napja!"  
 Depanteni indake cha'a gri ringa gri be'en ram'e  
 re'bapilako nikon Dira Didera namen ka'o nangaha,  
 aro Songdu Simerako bobil dingna tik ka'aha.  
 Uandake uni re'chakatnasiako Susime Niopa Salgira  
 Singepa chagrongaha. Ua ia pilak kajia ong'ani  
 a'selrangko knahaon, aro uamangni dakgrikna  
 tariako nikon iade namjawa ine nike uamangko  
 champengna kam ka'aha. Ua Dira Diderana agan-  
 aha, "Na'simangni ia dakenga kamde namja. Na'ara  
 miko song'e cha'gipa aro Songdu Simerara na'tokko  
 gittang cha'gipa. Iade Songdu Simerani gualanisan  
 ong'ja, nang'ni gualaniba ong'a. Na'a depanteko  
 chawari watna skangan ia cha'ani ringani bidingo  
 sandigrikchengna nangachim; aro indake  
 a'bachengaonin iako dakgenchim ong'ode nang'ni  
 depante okgimu chakna nangjawachim. Nang'ni  
 depanteara sikuja. Na'a Songduko ran'kreke tipatna  
 man'oba uara nang'na mai namgniko on'gen?"  
 Indake Susime Niopa Salgira Singepani gisik

gnangbee ku·patianiko knae, aro ian ong·chongmota ine nike Dira Didera Songduko a·jak sokjaha. Jeba ong·bo uamangni dedrang jik se ong·jahaoba uamangan skang chawari rimchengani gimin do·sion uamangni bimungrangko kamalrang da·alonaba mingengkua.

Do·sia jolni kri on·tiprakprak dingtanga. A·beng jolo indake do·sia. Uamang do·sina do·o manggit·tamko jakkala. Do·bipa mangsa, do·bima mangsa aro do·rasong, iarangko jakkale do·sianiko kamalni jakchi chu·sokata. Do·siako man·nasienggipa me·a aro me·chikko kamalchi mikkange asongata. Kamal unon do·bipako ja·ao ba grango rim·e me·asani janggilo uchin dokopata aro uni minganiko minga. Uni ja·mano kamal do·bimako apsan dake rim·e me·chikni janggilo dokopattaia aro minganiko mingtaia. Unon kamal do·o manggniko apsan rim·e manggnini skorangko changsa bil on·e aksotata aro uarangko a·aona goata. A·ao ga·ake sigipa do·bipani ku·sik me·chikchipak mikkangode, aro do·bimani ku·sik me·asachipak mikkangskaode rasong nama ine bebera·a.

Do·siani ja·mano joljol do·biknianiko dakronga. Iana do·rasongko jakkala. Kamal do·oko ra·e uni jaksi ge·gni napna gita dal·e okko raponga. Unon uni jaksi ge·gniko sikate bibik dal·gipako ote ra·baa. Ua bibik dal·dal·giparang nangdime dongode uamang jik se ong·e janggi tanganio nangrimani donggen ine bebera·a. Bibikrang dintang dintang



dake dongode siachi ba galgrikachi jik se dingtanggrikgen ine agana. Bibikko gitchakmrang bisringchi ping'ode sanamgija saa ba namatna man'gijagipa rok rogiko man'a ine agana. Bibikko cha'anian gapode jik se man'e cha'a, indiba bibik bangbangskaode kangal ong'skaa ine bebera'a.

## RANTA KA·ANIRANG 6

### 1. Sing'anirang :

- (a) Do'siani orto mai ?
- (b) Sawarang do'sianiko jakkala ?
- (c) Songdu Šimera maiko cha'achim ?
- (d) Dira Diderara maiko cha'skaachim ?
- (e) Maina Dira Didera Songdu Simerako a'jak sokna am'aha ?
- (f) Uamangni dakgrikaniko sawa maikai cham-pengaha ?

- 2. (a) A'gilsako sawarang chawari rimaniko a'bachengaha? Iani bidingo A'chikrang maikai agana ki·tapo pangchake sebo.
- (b) Kamal maikai do'sia, do'siani bewalko sebo.
- (c) Kamal maikai do'bik nia, do'bik niani bewalko sebo.

### 3. Bangbanggiparango ku'jikseko gapatbo :—

- (a) Do'sia— — — — — ; (b) Bía— — — — — ;

- (c) Sing·a- — — — — — ; (d) Ram·sisi- — — — — — ;  
 (e) Song·a- — — — — — ; (f) Rok- — — — — — ;  
 (g) Sia — — — — — ; (h) Mikkang- — — — — — .

4. Ka·mao on·sogimin kattarangko jakkale sentence rikbo :  
 (a) Do·sia ; (b) A·jak soka ; (c) Do·bik nia ;  
 (d) Chawari.

## LESSON 7

### RASONGNI KIMBRIONA

---

1. Chubate, chubate, chubate,  
     Doangbo me·tra-pante ;  
   Chubate, chubate, chubate,  
     Miksongbo na·ade ;  
   Chubea rasongni kimbrionade  
   Sokmanjawane miksonga gride.
2. Rakbate, rakbate, rakbate,  
     Ka·angbo na·a krenge ;  
   Rakbate, rakbate, rakbate,  
     Salak, wachi chake, bingmane ;

Rakbea rasongni kamrangde,  
Man·jawa aratgiparangde.

3. Mikrake, mikrake, mikrake,  
Nisobo na·a name ;  
Mikrake, mikrake, mikrake  
Dakbo mikasale ;  
A·ningbita gisikni bilrang,  
Niksokjawa gisik chubandarang.
4. Seng·bate, seng·bate, seng·bate,  
Teng·atbo nang' chakkiko ;  
Seng·bate, seng·bate, seng·bate,  
Chanchibo gisiko ;  
Mingname rasongni bimung chasongna gipgen,  
Nang' nama gunmi biba a·songo chipgen.

— Rev. Gilbert K. Marak.

## RANTA KA·ANIRANG 7

1. Ia poedoni podrangko nang·ni gisikoniko sebo.
2. Ia poedoo poedoko segipa pante me·trarangko  
maiko dakchina ku·patienga ?
3. Ka·mao on·sogipa kattarangko jakkale sentence  
rikbo :  
(a) Mikasal ; (b) Chubanda ; (c) Gisika·ningbita ;  
(d) Bingmana ; (e) Rasongni kimbri.

## LESSON 8

U Kiang NANGBAH

---

U Kiang nangbah Jaintiarangni mingsingbegipa matgrik ong'achim. Ua jattang aro a'songtangni jakgitelanina Englishrang baksa dakgrikaha aro indake a'songtangna janggitangko on'chakaha.

British Sorkari baksa Jaintiarangni kâjia ong'bemitingo Rajendra Singh Jaintiarangni raja ong'engachim. Jaintia a'songko bobil dingani somoio British Sorkarini dakchakani aro naljokat-aniko man'na gita raja Sorkarina tangka gong 10,000 ko on'na nangachim; indiba raja uko on'na jechakaha. Unbaksaba mande sakgittamko rim'e Kali mitena boli on'gipa Jaintia manderangko rim'e on'na raja jechakaha. Ia a'selrangko pa'sike 1835 ni February 23 tariko British Sorkari Jaintia a'songko ra'srangaha. Uamang Jaintiarangni skotong song Jaintiapuro dongdraeaha. Ua songjinmao donggipa bang'a sona, rupa aro gamchatgipa bosturangko Britishrang ra'seke ra'aha. Indagpipa obostarang an'tangtangona sokbaon Jaintiarang nikua'ke dongaijaha. Uamang British Sorkarini kosako bobil dake chakataha. Indiba ia bobil dake chakatani name an'tangtangni gisepo ku'monge dolsan dake chakatani ong'jachim; aro indake

bilding bildang ong'ani gimin Britishrang uamangko altuen bamatna man'aha.

1857-58 bilsirango nokni kajinako Jaintia a'songo ra'gataha. Jaintia rajani bang'a a'arangkoa British Sorkari ra'aha. Ia gital niamrangko Jaintiarang namnikjaha aro iarang uamangni ka'tongrangko bate ching'chaataha. Uamang da'o bobil dake chakataniko a'bachengtaiaha. 1860 ni March aro April jarango Jaintiarang British songnokni ning'o donggipa manderangna bang'a dukrangko on'aha. Uamang Jaintiapuronaba re'bae uano donggipa Police station-ko wa'alchi so'aha. British Sorkari Dacca, Sylhet aro gipin gipin biaprangoniko sipai-rangko rimbae Jaintiarangko dakgrikaha, aro jagnini gisepon uamangko bamatna man'aha. Britishrang Jaintiapuro Police Stationko dontaiaha aro sipai dolsako donjolaha. Jaintiarango donggipa pilak silchidarerangko uamang bobil dake chakataina man'jana gita korok ka'e ra'tokaha. Khasi-rangoniko ra'bagipa namnamgipa silrangko jakkalna on'gija a'pal joloniko ra'napbagipa namgijagipa silrangkosa uamangna jakkalna on'aha. Sorkarini indakgipa sinjetani kamrang Jaintiarangko ka'a ding'ataha aro iani a'selan bilongbegipa dakgrikani 1861 oni 1863 bilsirango ong'aha.

1861 bilsini December jao bilongbegipa dakgrikani a'bachengaha. Apsan bilsini December 28 aro 29 tarikrango Jalong songo donggipa manderang chrok-mesae manianiko songtango dakahachim.

Jowaio donggipa Police dolsa ua maniano dongpae chrok-mesao jakkalgipa pilak silchidarerangko korok ka'tokaha. Indakgipa sinjetanirangko Sorkari ong'atengani gimin da'o namedake warachak-srangna melapruaha. Uamangsriksrik tom'anirangko dakaha, silchidarerangko aro matgrikrangko chimongaha. Me'chikrangko aro bi-sarangko dakgrikmitingo donnuna rong'kolrangko sandiaha, mirangko chimongna jamrangko rikaha aro songrangko bol dal-dalgiparangchi killa kaduulaha. Uamangko ia pilako dakdilenggipara U Kiang Nangbah ong'achim. Uni dilanio Jaintiarang chu'gimik jakgitelanina dakgrikna tariaha.

Jaintiarangko bamatna British Sorkari bang'a sipairangko rimbaaha. Nangrimgrikachi tom'tomaniko ra'bana gita pil'ni pil nangrimgrikaniko dakna Sorkari Jaintiarangko okamaha. Indiba uamang jakgitelanina agre mamungkoba am'jaha.

Kiang Nangbahko tangkana mikbokgipa mande sakgni bobilna pale cha'aha. Uni ning'o donggipa dilgipa sakgni U Long Sutnga aro U Bor Daloi minggipa sakprak British Sorkarioniko tangka hajalprak ra'e Kiang Nangbahni dongnuenggipa biapko agane on'aha. Unomiting Kiang Nangbah mamungkoba uigija saengani gimin Umkarai minggipa songo dongnue dongengachim. British sipairang uanona sriksrik re'ange uko chadrape rim'aha. Kiang Nangbah uamangko pistolchi gona am'on guli chutijae gona man'jaha. Uko walosa

sriksrik Jowaiona rim'e ra'baaha. Uko December 30 tariko Jowai bazaro jinmao niksengao pasi on'e so'otaha.

Kiang Nangbah Janggitangko a'songtang aro mandetangna on'aha. Indakgipa mandeni kam chasongna jatni aro a'songni itihaso donggen.

## RANTA KA·ANIRANG 8

### 1. Sing'anirang :

- (a) Kiang Nangbah mai jatoni ong'achim ?
- (b) Mai bilsirango Jaintiarang Britishrang baksa dakgrikaha ?
- (c) Sawarang maini gimin Kiang Nangbahko pale cha'aha ?
- (d) Kiang Nangbahko bano aro maidake so'ot-aha ?

2. Britishrang Jaintiarangko maimai dake duk on'aha, tale sebo.

3. Kattarangni dingtanggrikaniko sentence rike talatbo :

- (a) So'a ; soa. (b) Dongnua ; donnua.
- (c) Ding'a ; dinga.

4. Ka'mao on'sogimin kattarangko jakkale sentence rikbo :  
 (a) Bobil dinga ; (b) Melaprua (c) Matgrik  
 (d) Korok ka'a (e) Ching'chaa.
5. Bangbanggiparango katta jikseko gapatbo :—  
 (a) Mela- — — — — — ; (b) Bobil- — — — — — ;  
 (c) Chrok- — — — — — ; (d) Niam- — — — — — ;  
 (e) Ku'mong- — — — — — ; Giscp- — — — — — ;
6. Ka'maoon'sogiminrangoniko Napsikgipa Adverb-rangko am'bo :  
 (a) Indakgipa sinjetanirangko Sorkari ong'ateng-  
 ani gimin da'o namedake warachaksrangna  
 melapruaha.  
 (b) Iani a'selan bilongbegipa dakgrikani ong'aha.

## LESSON 9

### MIKBOKANI

Bagdad songjinmao raja saksa dongachim. Ua pangnan an'tangni raijoni manderangni namgnina chanchironga aro kam ka'rongachim.

Salsao raja an'tangni manderangni janggi tanga-niko nina gita chanchiaha. Raja gita tarie mande-rangko grongode uamangni chong'mot obostarangko



uijawa ine raja nikaha. Uni gimin ua an·tangko ramram mande gita dakjee, an·tangni montrikoba apsan tariate songjinmani ramarangko re·angaha. Adita re·angon ua kana saksani bi·amengako grongaha. Ka·sachake raja una tangkako on·aha. Kana tangkako ra·chake aganaha, "Na·a angna tangkako on·ode angni skoo bilsa ja·achi ka·tingdatesa on·angbo." Indine aganako knae raja namen aiao inmane aganaha, "Anga nang·ni agana gita dakna man·ja ; maina ka·tingdatesa nang·na on·ode ua ka·sae on·ani ong·ja !" Unon kana tangkako on·pile aganaha, "Ga·tingdate on·gijagipaoniko anga mamung saloba ra·jawa ine anga Isolni bimungo mikchetman·aha." Unon raja alamala sajana gita uko ka·tingdate tangkako on·aha, aro unosa kana bi·amgipa tangkako ra·rikaha.

Salgipino raja an·tangni montriko okame kana bi·amgipako an·tangona rimbachina aganaha. Montri rajani agana gitan bi·amgipako rajaona rime ra·baaha. Unon raja bi·amgipao sing·aha, "Maini a·sel na·ara nang·ko ga·tingdate on·gipaonikosa on·aniko ra·chaka, maina gipinrangonikode ra·chakja ? Na·a iani a·selko donnugija angna aganna nanggen ; ong·jaode na·a sastiko man·gen."

Unon bi·amgipa an·tangni itihasko aganna a·bachengaha. "Moharaj, anga ia Bagdad songjinmaon atchia. Angni bimung Baba Abdula ong·a. Anga angni ma·a paani gamko man·rike uchin janggi tangna gita ut mang sotchetko breaha. Anga

ia utrangko jakkalen badinggiparangni malrangko gipin gipin biaprangona ra·time on·e janggi tangenga. Uandaken salsao Balsora minggipa songona malrangko ra·ange utrangko moe songtangchi re·bapilmitingo ramao saksa soinasiko grongaha. Ua soinas baksa golpo ka·e re·bamitingo ua angna gam bang·gipa a·bri totsani gimin aganaha. Angni ut mang sotcheti ampilgija ra·baoba gamrang uan uan dongaikugen ine ua angna aganaha. Soinas toromi mande ong·ani gimin ua an·tangde gamrangna chanchijachim. Uni gimin anga uko ua gamko angna mesokchina mol·molaha. Uni indake ka·sae dakanina angni ut mangsako gam gata gnan una on·atgen ine anga ku·rachakaha. Indiba soinas ut mangsako ra·na jechakaha. Soinas uko namnikkujae, angni ut mang sotbrio gam gata gnan on·atgen ong·ode angna ua gamko mesokgen ine aganaha. Angaba uni dabia gitan una on·na ku·rachakaha. Indaken ua angko a·briko doangdile adita a·pattal dakgipa biapo neng·takdilaha. Uano soinas wa·alko so·e montro jarion rang·san a·a ko·rang gni dake bretaha. A·ningchiko niaton anga nok te·sao tangka aro sona gappile dongengako nikataha. Unon anga ong·onange ut mang sotchetni janggilo gapa gapkujana kingking ua gamrangko rikgaaha. Unon re·chakatnasion soinas timi ge·sa nambeako angna mesokenba uko an·tangni cholao chipe ra·aha. Unon rang·san ua a·kol skang gitan namcheptaiaha.

Anga angni ku·rachaka gitan soinasina ut mang sotbriko gam gata gnang on·ataha aro ua an·tangni man·gniko ra·e gipin ramako re·angaha. Adita re·angon angni gisiko indake chanchiani ong·kataha, 'Anga maina soinasina ut mang sotbriko on·manaha ! Mitamko bi·pilode ua angna on·naba gnang, maina uade toromi mande ong·ani gimin gamko nangjawa.' Indaken anga uko rikange ut mang chikungko uo bi·pileaha. Uaba mamungkoba jechakgijan angna uko on·ataha. Da·oba angni gisiko mikbokani ong·kattaiaha. Soinasio ut mang kolatchi dongkuenga ; haida gipin mang chikungko bi·dapkuode ua angna on·atkunaba donga ine chanchie anga uko rikangtaie ut mang chikungko bi·etaiaha. Ua mamungkoba jechakgijan angna ut mang chikungko on·ataha. Aroba anggo mikbokan ching·chakuengachim. Uo dongrikenggipa ut mang kolgrikkon bi·riksrangode ua uarang gimikkon angna on·naba donga. Indake chanchie anga uko rikange dongspa ut mang kolgrik gimikko bi·on ua angna mamungkoba agangijan kusi ong·en uarangko on·ataha. Bon·kamao soinasio timi ge·sasan dongrikaijok. Anga unaba mikbokkue ukomangba bi·e ra·bana soinasiona re·angtaiaha. Anga ua timiko bi·on ukoba ua angna on·aha. Anga uko kulie nion uno sam gapako nike Soinasio uara maina choligen ine sing·aha. Ua samko jakrani mikrono nongode a·gilsak gimikni gam donggipa a·kolrangkon nika ine ua angna aganaha. Iako agane ua angni

mikrono ua samko nongaton a gilsak gimikni gamrangkon anga jojrangjrang nikatbebeaha. Jakasini mikronoba uko nongode aro bate gamrangko niknaba donga ine chanchie angni jakasini mikrono ua samko nongatchina anga uko mol·molaha. Indiba jakasini mikrono nongode kana ong·gen ine ua anga aganaha. Indiba anga uko bebera·jaha. Indake anga uko jetjetari aganani gimin ua agani jakasini mikrono ua samko nongataha. Unon rang·sanangni mikron andalaha, aro anga grape uko angko namatpilchina mol·molaha. Indiba ua angko namatani pal, ian angni kakketgijani aro mikbokani bite ine manengprete angni ut mang sotchetkon moe re·angaha. Anga mikron kana ong·e darangchiba re·na uijae unon dongaiaha. Indakmitingo Balsoraoni Bagdadona songregiparangsa ka·sachake angko an·tangtang baksa rime ra·baaha. Anga mikbokdugaani giminsa indakgipa obostao ga·akaha aro iana anga sastiko man·na kraa. Uni gimin anga sakgipinni boksis on·nako man·a changantin dokako man·na nanga, aro indake angko doke on·gipaonikosa anga on·aniko ra·chakgen ine Isolni mikkango mikchetaha. Ian angni itihās.”

Mikbokako man·na kam ka·aniara mandena dal·a gimaaniko ra·baronga.

## RANTA KA·ANIRANG 9

### 1. Sing·anirang :

- (a) Raja maina ramram mande gita dakjee  
Bagdad songjinmao re·roroaha ?

- (b) Ua sako gronge maina aiao inmanaha ?  
 (c) Kana bi'amgipako mai minga ?
2. Kana bi'amgipani itihasko kan'dike sebo.
3. Ia golpooniko na'a mai skianiko man'a ?
4. Bangbanggiparango ku'jikseko gapatbo :  
 (a) Janggi- \_\_\_\_\_ ; (b) Soa- \_\_\_\_\_ ;  
 (c) Samra- \_\_\_\_\_ ; (d) A'sel- \_\_\_\_\_ ;  
 (e) A'bri- \_\_\_\_\_ ; (f) Gam- \_\_\_\_\_ .

## LESSON 10

## A'CHIKRANGNI

## LEKKA-PORAICHENGANI

A'chikrangko lekka poraiatchenggipa aro A'chik A'songona skulko ra'bachenggipara David Scott ong'achim. Uan mingsinggipa English officer saksa ong'achim. Uni bang'a namgnirangko A'chikrangna dakna jotton ka'anina A'chikrang una dal'e gro nanga.

1816 bilsio Scott A'chikrangni golmal dakani-rangko bon'atna A'chik A'songni a'bri ja'retrangona British Sorkarini watatako man'aha. A'chik A'songona re'bae ua A'chikrangni mikmalgijagipa

aro ka·namgijagipa bewalrangko nikeaha. Ia indakgipa A'chikrangni bewalrangko dakgrikachi aro silchida'rechide mamung saloba gimaatna man·jawa; indiba uamangna a'gilsakni seng·aniko Kristoni ka·saani gisikchi on·nomangmangsa uamangko nambatatna aro bamatna man'gen ine ua nikaha.

Scott A'chik panterangko rim·drae skanggipa Mymensing jolo poraiatchengaha. Lekka-porani gamchatako uipajae A'chikrangoni saksaba matchote poraijaha. Mitamrangko sipai ba police kamranggo napatachim, indiba ua kamrangkoba uamang chu·soke ka'e cha·jaha.

A'chikrang lekka-porana gisik nangjaoba Scott miksongatangko dontongjaha. Ua pante sakgittamko Serampore skulona watataha. Uamangna mai ong'aha, mamungba janapaniko ja·mano niktaijaha. Ia sakgittamoni saksako Wake mingachim, aro uara sontolgipa aro poraina bimchippgipa ong'a ine serikaniko niode nikgen.

Gipin biaprangona A'chik panterangko watbring-brangate poraiataniko Scott chu·ongnikjaha. Ua A'chik A'songon A'chikrangna skulko kulina miksongaha. Unī gimin A'chik A'songo kulignigipa skulna missionaryko watatchina ua Serampore Missionna chitti seataha. Uni chittina mamungkoba dakchakna man·jawa ine ua knasoahaon Englandona seatskaaha. Englando ua chittini gimin maiko dakgen uijae Calcuttao donggipa Bishop Heberna

chitti seatchina aganataha. Uni gimin Scott Heberna chitti seatbebeaha. Bishop Heberba A'chikrangna skulko kulina namnikaha aro bang'a kupatiani-rangko on-dape Scottko skulko kulichina didiate chitti sechakataha. Indiba ia nambegipa kamko A'chikrangna a'bachengna skangmangmang ia Bishop a'gilsakko watangaha. Uni siani ja'mano darangba Scottna dakchakgipa dongjaha.

Dakchaknasigipako gimaatani ja'mano Scott, The Right Honourable the Governor General-in-Council-na A'chik skulni gimin 1826 ni June 5 tariko dorkastoko see watataha. Apsan bilsini October jao Council tom'aha aro iano Scottni dorkastoni gimin chanchiaha. Ia dal'begipa tom'anio (i) A'chik A'songo skul ge'sako kulina, (ii) ua skulko Singimari ba badiaba sepang jolo nambata biap dongode rikna aro (iii) Chunar songjinmao sam palgipa Mr. Valentine William Hurleyko skigipa dake watatna tik ka'aha.

Singimari skulo porainasigipa panterang gimik sak 40 gnangchim. 1826 ni bon'achibara Mr. Hurley Singimariona re'bae skulko kulieaha. Poraigipa chatrorang pilakan dal'gimin panterarasanchim. Uamang gimikkon ka'namgijagipa manderang gitasa niktokaiachim. Burung a'jangchio indakgipa mikmalgijagipa manderang baksa janggi tanganiko Hurley namen neng'e nikaha, aro ia an'tangni neng'nikaniko David Scottna uiataha. Uni gimin Scott Sylheto Baptist Missionary ong'e dongenggipa

Mr. Fenwickko ia skulni skigipa ong'china aro Hurleyko sagiparangko sanskachina ine 1827 ni July 10 tariko British Sorkarina chitti seataha. Unbaksa Ranggira a'bidinko a'solsol dakgipa jolrangko o'prake uano lekka-porako skiani aro ge'e game charaniko skie ra'ani nambegipa skulko kulina janapaha. Ia chittiko Sorkari 1828 ni June 26 tarikosa nan'soaha; indiba ia chitti sokna skangan Mr. Hurley kamtangko watani chittiko watataha aro Sorkariba uni am'a gitan uko kamoniko wataha. Uni pal Missionary sakgni aro namgipa doctorko watatskana tika ka'aha.

Mikmalgijagipa manderangni dongram burung a'bimanduona darang Missionaryba re'bana sikjaha. Uandake Singimari skulna Missionaryrangko man'jae Calcuttao Hindu Collegeni English aro Geographyko skigipa saksu Mr. Fermie minggipako Singimari skulni skigipa dake watatskaaha. Ua 1828 ni August jao skulko a'bachengtaiaha. Indiba rasong grie jagittammangna kam ka'e ua November jao sagitike siaha. Uni siani ja'mano ia skul sichipa gita ong'aha. Namgipa skigiparangko aro Isolna on'kange kam ka'nakgipa missionaryrangko man'jae Singimari skul bon'kamao gimasrangaha.

David Scottni indakgipa kamrang A'chikrangna baditana kingking ka'saachim, uko mesoka. Ua an'tangan mingsingbegipa English missionary Dr. William Careyni chatro ong'e aro uni nambegipa cholon aro Isolni kamrangna gisik nanganichi gisik



salako man'e nambegipa Kristian ong'aha. Ua Kristoni ka'saaniko A'chikrangna skie uamangko andalaoniko seng'aona salbana kam ka'aha.

## RANTA KA'ANIRANG 10

### 1. Sing'anirang :

- (a) David Scott sawa ?
- (b) Ua A'chik panterangko maikai poraiatna jotton ka'aha ?
- (c) A'chikrangna bano skulko kulichengaha ?
- (d) Sawa ua skulo skigipani kamko ka'chengaha ?
- (e) Ja'mano ua skul maikai gimasrangaha ?

### 2. David Scott A'chikrangna maimai nama kamrangko dakaha, tale sebo.

### 3. Ia lessono nang'ni poraie mang'imin gita A'chikrang maidakgipa jat ong'achim ?

## LESSON 11

## SNIGIPA CONTINENT

A'gilsak gimiko Continent dam dok gnanng ine an'ching Geographyo poraia, aro uan ong'aba ong'bebea. Indiba dal'begipa suurichi bilsia najol-jolan pindapako man'e dongkamaigipa a'a damsangnanng, jeni gimin bang'an bang'e uija. Uan Antartica ong'a. Uko gipokgipa suurichi pindapsimaiani gimin "Gipok Continent" ine minga, aro ua a'a dal'beani gimin uko dangipin Continent ong'na kranikpile "Snigipa Continent" ine mingpila. Ua Salgipeng Hemisphereo donga.

Antartica sin'batsranggipa aro sikdikdikbegipa biap ong'a. Uano ga'nannggijagipa aro a'briarigipa biaprang gnanng aro mitam biaprangode a'kawe daksara. Uani gipara Australia a'songni changgni ong'gen ba Europe aro United Statesko dondime dal'ani gita apsaugen. Uano donggipa suuri gimik United Statesko pindapode indide Kilometer 3.22 ritchae pindapna man'gen.

Antarticako salgrochi Atlantic Sagal, salgipengchi Pacific Sagal aro salaramchi Indian Sagal dongdulachim. Uni gipa gimik 82,11,000 sq. km ong'gen. Uko hisapon uani apala a'gilsak gimikni a'ani bak chikungni baksani dal'a gita apsan ong'gen.

Ua biapo māmung sam bolrang chajachim. Ding·karini somoio on·tisa a·a nakatgiparango chonchongipa rong·kusimang dakgiparang chaana agre mamungni chaaba dongja. Scientistrung ua biap sin·dugaani gimin uan a·gilsak gimikna akal karap ong·ani somoiona cha·aniko ripinge donna namgen ine chanchienga, maina indake ka·singipa biaprango cha·anirang sojachim. 1903 bilsio Captain Scottni aro 1912 bilsio Sir Earnest Shackletonni cha·ani donbagiparangko bilsio sotbrini ja·mano nikepilon mamung ·nosto ong·gija cha·na namengkua ine nikaha.

Ua biapo bang·a a·ningni gamrang gnang. Koela, sil, tarnani sil, sisa, so·re, uranium aro indakgiparang bang·en donga ine uigipa manderang agana. Uano sin·gipa aro suurio rogipa do·orang bang·en donga. Uni sagal rikamrango timi na·tokrangba bang·a aro uano timi na·tokko badinge cha·na namgen ine agana.

Ua biap Captain James Cookni nikechengo jekai kengni ong·a da·oba apsan daken kengni ong·kuenga. Uano ta·rakbegipa balwarang balronga aro uan kontaprako kilometer 257 mang ta·rake bala. Indakani giminan uko aeroplaneo bilsotnaba namen kenani ong·a. Indake suuri gnang ta·rake balwa balon mande malame re·ana agre chadengede mamung saloba re·na man·jachim.

Antarticao kari damgnisan dongaia; uan Ding·kari aro Sin·kari. Ia kari damgnian ja dokdok

jaroa. Jadok sin·kari ong·mitingo andalsimsimaia aro salko on·tisaba nikjasrangchim. Ja dok dīng·kari ong·mitingo sal napskajachim aro walan dongska-jachim. Sal teng·ani giminan jarenako sal teng·suao donode mikronchi nichakna man·ja gita apsan daken ua suurikoba sal teng·brapanan nichakna neng·achim.

Da·ororo bang·a a·songrang· uanona re·ange Scienceni bidingo ma·manti sandianirangko aro am·rikitanirangko dakenga. Da·odipetarang a·songba ia Snigipa Continentko chingni ine kangkuja, aro indaken pilak kamon da·odipet iano meli-nangrime kam ka·tokenga.

## RANTA KA·ANIRANG 11

### 1. Sing·anirang :

- (a) Badia biapko maina Snigipa Continent minga ?
- (b) Uko maina "Gipokgipa Continent" ineba mingaha ?
- (c) Antarticanī dal·a badita ong·a ?
- (d) Uni maimairangko nikna man·a ?
- (e) Antarticanī karirangko maikai ong·a talatbo ?

### 2. Snigipa Continentni gimin nang·ni uia gita poraigimin lessono pangchake sebo.

3. Bangbanggiparango katta jikseko gapatbo :—  
(a) Sin'a- \_\_\_\_\_ ; (b) Akal- \_\_\_\_\_ ;  
(c) A'song- \_\_\_\_\_ ;

## LESSON 12

KA'SAGIPA MA'A

---

1. Sok kane tangata  
Ku·rang ka·sariri,  
Dede racha dede  
Ja·del bolchaata,  
Rima gipakari  
Tuata sari gri,  
Sawa ? Ama.
2. Tusiningjan salo  
Grapna kenchake  
Mikkang nitatari  
An·tang kam bang'o  
Choljokjawa ine  
Be'nko rim·rokari  
Mumua sawa ? Ama.
3. An·sengani salo  
Be'ntangko jokjoke  
Niate an·tangchi

Kam a'sel joko  
Ja'ping morurue  
Rinoka ku'chilchi  
Kur'dima sawa ? Ama.

4. Saa ding'an salo  
Bi'sa sabilonge  
Sambao asonga,  
Kara angija sano  
Deko sina kene  
Mikchiari nia  
Sawa ? Ama.
5. Roe ba kate re'e  
Man'o saknaako  
Bakbakan salchroa,  
Basakobara ga'ake  
Mikkang ku'chil matako  
Gipake kur'dima  
Sawa ? Ama.
6. An'tangni dal'mano  
Indonga kanrangko  
Chanchigija dongna,  
Gisik sokahao  
Ma'ani ka'saako  
Man'ama gualna  
Ma'tangko ?

## RANTA KA·ANIRANG 12

1. Ma·gipani namgipa gunrangni gimin poedoo agana gita sebo.
2. Ia poedoni podrangoniko nang·ni namnikbatgipa pod gniko gisikoniko sebo.
3. Bang·banggiparango katta jikseko gapatbo : —
  - (a) Ja·del- \_\_\_\_\_ ;      (b) Sari- \_\_\_\_\_ ;
  - (c) An·seng- \_\_\_\_\_ ;    (d) A·sel- \_\_\_\_\_ ;
  - (e) Saa- \_\_\_\_\_ ;      (f) Mata- \_\_\_\_\_ ;
  - (g) Kam- \_\_\_\_\_ .
4. Ka·mao on·sogimin kattarangko jakkale sentence rikbo :
  - (a) Ja·del bolchaa ; (b) Sari surigija ; (c) A·sel gamu ;
  - (d) Mikchi chiwaringa ; (e) Grapmanggasia.

## LESSON 13

## NA·A CHA·UNABE

Gopal aro Rakal minggipa bi·sa sakgni gnang·chim. Gopal Rakalna bate bilsa batachim. Bilsio dingtanggrikoba uamang melibegipa ripengrang ong·achim.

Salsao uamang salo skulko matchote nokchi re·angpilengachim. Skulo pring gimik dongani gimin uamang okkriaaha. Adita re·angon uamang ramasamo mande saksani bagano gitchak ripet minenggipa te·gatchuko nike sakgnian mikbokaha. Rakal ripengtango sengsrapgijan baganchi napangna berako gadoengjokchim. Unon Gopal uko beng·aha.

Gopal : Ripeng, na·a baganchi napangnabe ;  
           nang·na namjawa !

Rakal : O, maisa ong·gnokde, darangba nikjawaba.

Gopal : Na·a bagan ning·chi napangnabe ; ja·manode  
           nang·naba angnaba namjawa !

Rakal : (Nipile aganaha) Na·ara te·gatchuna  
           mikbokjama ? Na·aba okkriengakonba.

Gopal : Anga ua te·gatchurangna mikbokoba aro  
           okkriengoba, indiba gipinni baganoniko  
           anga sriksrik cha·ue cha·jawa.

Rakal : De, maisa ong·gnok ? Na·a aganjojojaode  
           darangba uijawaba.

Gopal : Ripeng, na·a sakgipinni bostuko sriksrik  
           ra·ode, uan cha·ua ong·a ine uijama ?  
           An·chingnaskuloskiatakona·agisikra·jama ?

Rakal : Okkriana cha·ode mamung ong·jawa ine  
           angade chanchia.

Gopal : Okkriana cha·oba cha·ue cha·ode uan  
           namja.

Rakal : Anga an·tangni okkaa gitasan cha·aigen,  
           aro nang·naba mitam·ra·bagen.



Gopal : Anga nang·ni cha·ue ra·bagipa te·gatchuko  
cha·paode angaba cha·ua ong·pagen.

Rakal : Angna namjaode namjachina, indiba  
angade jeba ong·bo te·gatchukode ake  
cha·telgnok !

Gopal : (Mol·mole) Ripeng, na·a chanchikubo.  
Mikbokana kam ka·e na·a an·tangna dukko  
ra·banabe !

Rakal : Anga an·tangko okkaatana agre ang  
mamung dukni dongjawa.

Gopal : Ripeng, ia gitchakripet minenggipa te·gat-  
churangko mikbokatachi nang·ko Satan  
dakmajoenga ine na·a uijama ? Skango  
Hobakoba indake chi·su chi·su, tosu tosu  
mingipa bitechin Satan majoaha. Hoba  
biteko cha·ahaoa Isol ka·onangaha. Ja·mano  
uamang jaiksesako Eden barioniko rike  
galaha ! Cha·uani Isolni niamko pe·ani  
ong·a. Na·a uko uijama ?

Rakal : (Ka·onange) Na·a agre bel·bela, Na·a jekoba  
aganbo, angade te·gatchuko ake cha·telgnok.  
(Indine agane ua te·gatchu bolchi re·angaha.  
Gopal ripengtangko beng·o man·jae rama-  
tangko noktangchi re·baaha. Rakal  
te·gatchuko kusi ong·bee ake cha·engmit-  
nigo bagan nokgipani jilgipa achakrang  
uko rikbaaha. Ua achakna kene sketbaket  
boloni ong·onbaaha aro janggitangna kene  
katon jenten ua baganoni jokbaaha. Ua

~~baganoni jakbaoba achakrang uko rikbaku-~~  
engachim. Uni gimin ua an'tangni bil ama  
gita kataha, aro jenten achakrangoni jokba-  
aha. Ua indake katangon Gopalko ramao  
srapeaha. Rakal neng'a amchakjae ramao  
ga'akgopaha).

Gopal : Ripeng, da'oara mai ong'jok ?

Rakal : (Ka'po ka'po dake) Angko bagan nokgipani  
achakrang chikna rikbaaha. Anga jenten  
kate jokaha.

Gopal : Na'a beben signioni jokbaaha; indiba  
nang'ni be'enrangko nibo! Nang'ni  
cholarang dongjajok, nang'ni ka'bakrang  
aro mikkangrang mattokjok! Nang'ni  
ki'taprangba dongjajok !

Rakal : (Duk man'e aro kratcha'a gnan) Oe, angni  
ja'a jakrang, ka'bakrang matbeaha. Angni  
cholarang aro ki'taprangba gimikan ramaon  
bon'rikaha. Anga nang'ni kattako knachak-  
ode indake ong'jawachim !

Gopal : (Manenga gnan) Cha'uode indake duk  
man'a ine anga nang'na aganachim; uko  
na'a knatimjaha. Na'a cha'uangkuode iana  
bateba duk man'gen, uko uibo. A'gilsakoba  
na'a da'o gita duk man'gen, Sorkarini  
dongimin sasti patok donakoba man'gen  
aro simano cha'ugiparangna Isol norokko  
donsoenga. Nang'na da'on namenga. Na'a

gisik pil·bo aro da'al dipet namgipa bi·sa ong·bo.

Rakal : Te·gatchu cha·uanan anga indita duk man·na nangahaode, indide jana bate namjabatgipa kamko ka·ode baditan anga duk ong·batgen ! Anga Isolni ka·onangako man·na sikja aro norokchi re·naba anga kena. Angna ian dal·begipa skiani ong·aha. Anga cha·utaijawaha, aro da'al dipet namgipa bi·sa ong·gnok.

Gopal : (Kusi ong·e) Nambejok ! Anga uko knana kusi ong·a.

### RANTA KA·ANIRANG 13

#### 1. Sing·anirang :

- (a) Gopal aro Rakal banoni re·bapilengachim ?
- (b) Uamang ramasamo maiko nikaha ?
- (c) Rakal maiko dakaha ?
- (d) Ua maikai mata bu·ako man·aha ?

2. Cha·uaniera maikai namja ? Cha·ugiparang duk man·a ine mesokna ia·lessono pangchake sebo.

3. Bangbanggiparango ku·jikseko gapatbo : —

- (a) Beng·a- \_\_\_\_\_ ; (b) Bari- \_\_\_\_\_ ;
- (c) Chi·a- \_\_\_\_\_ ; (d) Niam- \_\_\_\_\_ .

## LESSON 14

FERDINAND MAGELLAN

---

A'gilsak tom·beta ine an·ching Geographyo poraia. Da·ode an·ching a'gilsak tom·betani sakki-rangko bang'en man·na amaha. Skangni salrangode iako uina manderang janggi tangtangko galpile rake kam ka·na nangaha. Bang'a manderang a'gilsakko chowilwile niesa a'gilsak tom·beta ine uiaha.

Columbus a'gilsakko chowilwile nina jotton ka·aha. Ua saliram gita choange Indiaona sokgen ine chanchie saliramchina mikkange choangahaon America a·songkosa nikeskaaha. Columbusni ja·manoba Spainni raja saliramchiko re·ange India a·songko nikna man·gen ine bebero·engachim. Uni gimin ua bebe ong·ama ong·ja uko nina gita Ferdinand Magellanko watataha.

Magellan Spainni mande ong·jachim. Ua an·tangde Portuguese mandesa ong·achim. Ua aro uni dol 1519 bilsini September 20 gipa salo Spainoni saliramchipak mikkange chochakatangaha. Ua skanggipa South Americaona ka·dongoe choangaha. Ua salaram sagal rikamjoljol choange salgipengchi a·kuchotona sokeaha. Uko Cape Horn ine mingachim. Darangba ua a·kuchotko nikekujachim. Ua a·kuchotko bate re·na man·genma man·-

jawa pilakan jajrengaha, indiba Magellan jajrengja-chim. Uni kalasirang uko ka'onangaha aro jahas gesade pil'rikaha. Ua salgipengchi sagal rikam-rangko nikangaha aro ja'mankitiko chirara bang-bang dakgipa biapona sokeaha. Ua gita re'na man'gen ine choangon, uara dal'gipa chibimasa ong'a ine uamang ja'mano nikaha. Ua pil'bataie apchonbee jokgipa aro dare ta'ragkipako choangaha. Balwa ta'arakana kene uni kalasirang sibokna am'pilaha; indiba Magellende kenkujachim. Ua kengiparangko ka'dongate ua apchongipa sagalko choangkuaha. Ja'mano uamang apalbegipa sagalona sokeaha. Ua sagalni chi tom'tombeani gimin Magellan uko Pacific Sagal ba Tom'tomgipa Sagal ine bimung donaha. Ua chiapgitokko chosotna nangachim, aro ua ia chiapgitokko antangni bimungchin Magellan Chiapgitok ine mingaha. Ua chiapgitok gitan ua South Americako batsotna man'aha. Ua chiapgitokko chosotna ua sal kolatchi-chetko nangaha.

South Americako batbaon Magellan a'gilsak samsakode re'duulmanaha. Uandake da'o ua Philippine chichangona sokeaha. Uano dongmitingo ua ua a'songni raja baksa ripeng dakahaoba ja'mano bobil ong'grike dakgrikna nangaha. Ia dakgrikanion Magellan aro adita sak uni kalasirang siaha.

Magellanni siani ja'mano Del Cano ua dolko dilangskaaha. Balwa ta'arakoba, chi pokpekoba songtangchina mikkangengaha ine ka'donge ua

choangdilaha. Uandaken Vasco da Gamani Indiaona chobagipa rama Cape of Good Hope gita choange 1522 ni September 8 tariko songtangona sokepilaha.

Del Cano songtangona saliram gita choange sokbapilon a'gilsak tom'betchongmota ine mande-rang bebera'aha.

## RANTA KA'ANIRANG 14

### 1. Sing'anirang :

- (a) Magellan sawa aro badia a'songni mande ong'achim ?
- (b) Ua basako aro maina saliramchipak choan-gaha ?
- (c) Badiako Cape Horn ine minga ?
- (d) Badiako Magellan Chiapgitok ine mingaha ?
- (e) Magellan bano aro maidake siaha ?
- (f) Magellanni ja'manosawa uni kamkora'rikaha ?
- (g) Uamang basako Spainona sokepilaha ?
- (h) Uamang sokepilon manderangko maiko bebera'aha ?

2. Magellanni a'gilsakko chowilwilani gimin lessono pangchake sebo.

3. Bangbanggiparango kragipa kattarangko gapat-bo :

- (a) Magellan \_\_\_\_\_ bilsini \_\_\_\_\_ jani

- \_\_\_\_\_ tariko Spainoni \_\_\_\_\_ choangaha.  
 (b) South Americani a'kuchotko \_\_\_\_\_ minga.  
 (c) South Americani Chiapgitokko \_\_\_\_\_  
 minga.  
 (d) Magellan \_\_\_\_\_ chichango siaha.  
 (e) Magellanni dol \_\_\_\_\_ bilsini \_\_\_\_\_ jani  
 \_\_\_\_\_ tariko Spainona sokbapilaha.

## LESSON 15

## BEHDEINKHLAM

---

Behdeinkhlam Jaintia jatni mingsa mongsongbat-gipa maniani ong'a. 'Behdeinkhlam' -ni mangsong-aniara manderang bilsu gimik kusi ong'e janggi tangna man'na gita sabisiko aro sabisiko ong'atgipa putko rikgale galani ong'a. Unbaksa ian mande-rangna mi misiko aro gamsengko patichina isolko okamaniba ong'jola. Iako bilsiantin a'barango bitchil goani ja'mano July jamango ong'atranga.

Behdeinkhlamko Jowai songjinmao aro uni wilwilao donggipa Kristian ong'gijagipa Jaintia manderang manironga. Ia Jaintia rangni torom-koara 'Niam Tre' minga. Ia manianiko salbrina ong'atranga.

Behdeinkhlamko manina antisa skangan uamang wakko mikkarangna boli on·chenga. Ia uamangni Behdeinkhlamko manimitingo mikka waatchina boli on·ani ong·achim, maina iako manio mikka wajaode bilsa namja ine uamang bebera·achim.

Manianina antisa skang pilak gittimrangoni dilgiparang 'chew-chew' minggipa dokani ba Susuakko doke sorokrango re·roroa aro indake uamangni burungo donggipa ro·rengreng dake rinoke sol·gimin ro·begipa bol, jekon 'Deinkhlam' mingachim, unona re·joljolanga. Iani ortoara ramarango aro gittimrango roe donggipa sabisiko ra·bagipa putrangko rikgalani aro manderangna Behdeinkhlam sokbaengaha ine aganpraksoani ong·a. Maniani gnigipa salo uamang Deinkhlamko burungoniko ra·bae lawmusiang Barabazaro walsa dona. Salgipino, ua antini salba ong·jola, attamni 2 ba 3 bajimango uamang Deinkhlamko gittimtang-tangona ra·anga.

Maniani salrango salantian bak ra·giparang pringoni attamona chroka. Uamang wachichake chroka aro uamang Bhuri ba bangsi, Ksing ba dama, Bikar ba adil aro chew-chew ba Susuakrangko dokani gam·anirangna ma·rape chroka.

Panaliar ,gittimni manderang me·asa aro me·chikni bimangko wa·aoniko tarie uarangko nitobee ba·ra ganata. Uamang ua bimangrangko ripee chrokon bimangrangkoba chroka gita nikpila-



chim. Ia bimangrangkon uamang 'Theng Theng' minga.

Behdeinkhlam maniani bon'chotgipa salode pring 5 bajionin 'Khynting-Khnong' ingipa manianiko a'bachengachim. Iako me'chik kamalni sa'raosa mania' aro Longpia gittimni manderangsan ia manianio bak ra'na man'aiachim. Ia maniako a'bachengna skang me'chik kamal chu botolsako kamalna on'gen aro kamal uko Longpia gittimni dilgipana on'skaa. Unon kamal manderangni an'seng-baljokanina aro uamangni batanggimin salrango dakgimin paprangko kema ka'china isolobia. Unon kamal chuko ra'e a'ao rudape an'tangba groksa ringe jinmana on'ritingata. Pring 7 bajimango gittimantini chrokgiparang nokantionan re'e nokkingko bol bisachi doka. Nokkingko dokmitingo uamang minganirangkoba mingroroachim. Ian sabisirangko aro putrangko a'rikgalani ong'achim. Nokantio indake dakani ja'mano noktangtangona re'bae uamang mi cha'a.

Attam 2 bajimango dingtang dingtang bimangrangko tarigiminrang ba 'Rots' minggipako uamang 'Aitmar' ba Rongtalgipa Chibolona chrokroroe ra'baa. Uko uamang chi jangchiona ra'ange changgittanmang morekreke chisamona ra'bapila, aro uko uno dona. Unon Shiliangrahi minggipa gittim skang 'Khnong-blai' aro ja'mano 'Symbud-Khnong' minggipako chibolona ra'baa. Symbud-Khnong aro Khnong-blairangara dal'gipa, ro'begipa

aro rin'oke sol·gimin bolrang ong'a. Iarangko ra·baon chrokgiparang dontongna nanga aro Khnongna rama wate on'na nanga. Ia Khnongko chibolo donahaon jinmaoni sakantian uchi chadingdange Khnongo chandengna jotton ka·toka. Khnongo chadengna man·gipade bilsimimiko be'en an·senge janggi tangna man'a ine uamang bebera'a. Uni ja·mano umang 'Rots' -rangko chiningo galate noktangtangchi re·angpila. Unikode uamang aue, name gane chine Dalwakor minggipa ka'aniko nina re·anga.

Ia manianio me·asarang chu ringtoka aro chuko pilaknan sua. Uamang ia manianio chuko peke ringoba chu ringrakgiparangde ong'skaja. Bang'an ia manio ringana agre bilsimimide chuko ringskaja. Ia manianio, chrokanirango aro dingtang dingtang boli on'ani kamrango me·asararasa jak on·rongaia.

## RANTA KA·ANIRANG 15

### 1. Sing'anirang :

- (a) Behdeinkhlam badia jatni maniani ong'a ?
- (b) Behdeinkhlamko mai miksonganio mania ?
- (c) Bilsini mai somoirango manironga ?
- (d) Maiko Deinkhlam minga ?
- (e) Maiko Theng Theng minga ?

### 2. Behdeinkhlam maniani gimin lessono pangchake kan·dike sebo.

3. Bangbanggiparango meligipa kattarangko gapatbo :

- (a) Behdeinkhlamko \_\_\_\_\_ ja mango manironga.
- (b) Jaintirangni toromko \_\_\_\_\_ minga.
- (c) Panaliar gittimni manderang wa'aoniko me'a aro me'chikni bimangrangko taria, aro ukon \_\_\_\_\_ minga.
- (d) Jaintiarang Rongtalgipa Chibolko \_\_\_\_\_ minga.
- (e) \_\_\_\_\_ aro \_\_\_\_\_ dal'gipa, ro'begipa aro rinoke sol'gimin bolrang ong'a.



## LESSON 16

### EDWARD JENNER

---

Uri ian mandeni be'eno nakatgipa ma'sa kenbegnigipa sabisi ong'a. Ia sabisina pilakan kena, maina ian batrikrikgipa ong'a. Skangni salranggo

ia sabisiko man'gipa manderangna mamung tangna ka'dongani dongjasrangchim, aro ian batrikrike saksani ja'mano saksu manderangko siatachim. Indiba rasong gnange ia chasongo ia sabisini ong'kataniko champengna rokomsa sam ong'kataha. Ia samko bikotchenggipa mandeara Dr. Edward Jenner ong'achim. Ia samara da'ororo an'chingni nikenggipa aro jakkalenggipa tikka su'ani (Small-pox vaccination) ong'achim.

Dr. Edward Jenner 1749 bilsini May 17 tariko England a'songo atchiaha. Bi'sa intalan Jenner saksu chanchirakgipa aro chonchonbegipa jo'ong aro do'o-matrangni gimin sandirikite uarangni dingtang dingtang janggi tangani bewalrangni gimin ma'sie ra'na jotton ka'gipa ong'achim. Ua indake darangni nikgijaniko nikna aro darangni uigijaniko uina man'skaaha.

Jennerni tikka su'aniko bikotna man'aniara mingsa a'selchi ong'aha. Ua salrango Englandni mitam bakrango uri nae satokengachim. Ia a'sel ong'mitingo mingsa chanchiani uni gisikona sokbaaha; chong'motan saoba uri jo'ongko be'eno man'soode ja'mano bilonge sabisiko man'aoni jokskagen. Ua an'tangni chanchianiko dake nina a'bachengon pilak manderangan aro dal'dalgipa doctorrang uko jaragokani kamko ka'enga ine ka'dingstektokaha. Minggipin uni neng'nikaniara tangka chu'onggijani aro bosturang donggijani

ong'achim. Indiba iarangoni mingsaba uni miksong-aniko rongdimelatna man'jaha.

Jenner an'tangni dake nianiko matchotna bilsil kolgrik nangaha. Indake ruute dake niani ja'mano salsao 1796 bilsini May 14 tariko ua me'a bi'sa saksako rim'tate matchuni jo'ongko (Cowpox) biji su'e uni be'en ning'chi chipataha. Apsan bilsini July 1 tariko uri jo'ongko apsan bi'sani be'eno biji su'e chipattaiaha. Da'o ia bi'sao uri najaha. Ia aiao inmanpilgipa chu'sokani kenbegnigipa uri sabisini kosako cheaniko mandena ra'baaha.

A'bachengo darangba ia gital samna gisik nangtokjaha; batesa uamang uko chonnike aro kal'stape roaha. Indiba ruutgija salrangni gisepon manderang ia samni nambegipa kamko nikaha, aro unon pilakan uni gamchataniko uiaha. Uandaken ruutgijan ia gital samko a'gilsak gimikchi mingsingangaha.

Jenner an'tangni samko bikotani niamko parak-gija done aro an'tangsan iako dake pale bang'a tangkarangko chimongna man'genchim aro a'gilsako man'e cha'batsranggiparangoni saksa ong'genchim. Indiba ia mandeni sontolgipa gisik aro toromigipa ka'tong uko indake an'tangnasan chanchiaina sikatjaha. Ua an'tangni bikote man'giminko pilakan uichina gita 1798 bilsio lekkao see parakataha. Tangkana ua mikpakma nijaha. Uni gisikni sikani-ara mandeskana namgniko dakna aro uamangna

dangdike on'nasa ong'achim. Uandake ua salprako sak ritchagittaman komigija kangal manderangko indin tikka su'aha.

Jenner Catherine minggipa me'chik saksako bia ka'aha. Ua namen sontolgipa aro segipana on'kang-gipa me'chik ong'achim. Se'gipani pilak neng'gipa kamrangko ka'mitingo ua uko dakchakrongaha aro uko kusi ong'ate janggi tangdilaha. Uamang jiksesean toromibegiparang ong'achim aro kangalrangna dakchakna sikani gisik uamang sakgnion donga-chim. Uandaken segipa tikka su'achi kangalrangko dakchakon, jikgipa uamangna bang'a skulrangko kulie Sastroko skie on'skaaha.

Englishrangko mitchibatsranggipa France a'songni raja Napoleonba Jennerko mandera'achim. Uni Englishrang baksa dakgrikmitingo adita English sipairangko ua rim'gopaha. English Sorkari Napoleonna uamangko a'songtangchi watatpilchina mol'molani kattako watataha. Indiba ua uamangni mol'molaniko knachakjaha. Salsao Napoleonni jik-gipa Josephine segipana chitti kingsako on'aha. Ua chittiara Jennerni English sipairangko watatpilchina seatgipa ong'achim. Jennerni chittiko nikon Napoleon jikgipana inaha, "Jenner! Anga mamung saloba ia mandeko jechakjawa." Indake ua English sipairangko a'songtangchi watattokpilaha.

Dr. Edward Jenner 1823 bilsini January 25 tariko siaha. Uni be'en bimang dongjahaoba uni aiao

inmanpilgipa kamrang a'gilsako dongkamanggen.  
A'gilsakni itihaso "Edward Jenner" ingipa bimung  
pangnaba gimajawaha.

## RANTA KA'ANIRANG 16

### 1. Sing'anirang :

- (a) Dr. Edward Jenner basako aro bano atchiaha ?
- (b) Ua mai sabisina samko bikotaha ?
- (c) Jennerni jikgipako mai mingachim ?
- (d) Jenner basako siaha ?

2. Jenner mai samko maidake bikotaha ? Tale sebo.

3. Jenner aro uni jikgipani namgipa kamrangni  
gimin sebo.

4. Napoleon maidakgipa namgipa mandera'ani  
kamko Jennerna dakaha ?

5. Bangbanggiparango katta jikseko gapatbo :

- (a) Sabisi- — — — — ; (b) Do'o- — — — — ;
- (c) Ja'man- — — — — ; (d) Chonnik- — — — — ;
- (e) Samra- — — — — ; (f) Gisep- — — — — .

6. Bangbanggiparango kragipa kattarangko gapat-  
bo :—

- (a) Dr. Edward Jenner — — — bilsini — — —  
tariko Englando atchiaha.

- (b) Uri \_ \_ \_ \_ sabisi ong'a.
- (c) Jennerni jikgipako \_ \_ \_ \_ mingachim.
- (d) France a·songni raja \_ \_ \_ \_ Jennerko mandera·achim.
- (e) Jenner aro Catherine jiksesean \_ \_ \_ \_ ong·achim.
- (f) Jenner \_ \_ \_ bilsini \_ \_ \_ tariko siaha.

## LESSON 17

## A'CHIKRANGNI SKO SOTANI



A·chikrangko sko sotgipa aro an·chi ringgipa ka·namgijagipa jat ine agana. Ia aganani ong·aba ong·bebea, maina skangni A·chikrang sko sote aro an·chi ringe janggi tangbaaha. Uamangni somoio uamangni sko man·anide rasong aro mikkimsa ong·achim. Badiaba me·asa mande sko dongpajaode



namen rarong be'achim. Mande sko dongpagijade jinma baksa ropa-dongpanan kratcha'anichim !

A'chikrangni mande den'ani gimin bang'en ki'tapranso seaha. A'chikrang a'brirangoni a'pal jolo donggipa gipin jatni songrangona re'ange uamangko sko sotaha, nokrang aro gama-ge'ani-rangko wa'alchi so'aha. Unikode uamang mande skorangko gamchatgipa boksisi gita ra'e diltugipa aro kenbegnigipa a'brirangchi katachim. Indakgipa biaprangona darangba uamangko rikangna pa'jachim.

A'pal jolo donggipa gipin jatni manderangko A'chikrangni sko sotani, bang'a changon a'jak sokanisa ong'achim, maina gipin jatrang uamangko kajia botrongachim. A'chikrang na'kamna aro karina anti re'a aro an'tangtangni a'barango ge'gipa kil aro jal'likrangko antirango palronga. Mong-songbate A'chikrang kilko palbata. Indaken A'chikrang antichi re'angon A'chikrangni kilrangko dam on'chepe ra'achim. Karirango an'chengrangko brine aro chi sim'e jriate togie palrongachim. Unbaksa uamangko matchu cha'gipa aro indake burungni mande ine chonnikrongachim. Indake kal'stekako aro cha'bokako man'on A'chikrang chakchikna man'jae a'jak sokani gita pangnan jinma jinma a'pal jolona re'ange uamangko sko sotachim.

Songo-noko janggi tangpaoba me'asarang mande sko dongpagijade mikkim rasongan dongpajachim. Uamang an'tangtangni man'gimin skorangko rengsi

sike dingdee donrongachim. Mande sko bang·batgip-asa matgrik ine mingako man·achim, aro uamangsa songo noko dilgiparang ong·achim.

Skangni chasongo salsao song damsao chrok-mesaani sal ong·achim. Songni matgrikrang saksani ja·mano saks grike-toree matchotangtokaha. Uamangni indake griko-toreako nike pante saks namen mikbokbeaha. Uandaken ua rang·san uano dongipa mil·am aro sepiko ra·e grikaaha aro a·bokaba a·bokpaaha. Unon nina misilpilgipa aro nion nichakna man·pilgijagipa matgrik saks jinmaoni re·baaha. Uara grikenggipa pante bi·sani mamagipan ong·achim. Mamagipa gritangko chonnike aganaha, "Mande sko dongpagijamang-mang grika-a·boka dakpaienga?" Unon jinma una ka·dingstektokaha. Ua pante kratcha·beaha aro jinmaoni ong·kate re·angaha. Un attamo ua ripeng-tangko rime songgipinni mandeko sko sotna re·angaha. Uamang sakgni songsamona sokon a·ba tugipa mandeko borangoniko nikataha. Uamang burungo attam gimik ua mandeni tusiana sengtim-aha. Jajong nambeani gimin a·ba tugipa mande tusigija bangsi sike waltingaonan dongaiachim. Waltingosa aro pilakchia jripmitip ong·ahaosa ua mandeba tusiaha. Unon uamang sakgni borangni jang·keko ka·sne gadoangaha. Borangona sokon a·ba tugipani tusiengako nike sel·uchi uko bildape ka·tongo su·protataha. Tusienggipa mandeba namen bilakachim. Ua janggitangna dakgrikchakaha aro

sel·u an·tangni ka·tongo bu·protoba uko an·tangchin salpile an·tangko su·gipa mandeko rim·na jotton ka·aha. Uandake dakgrikeh su·ako man·gipa su·enggipa mandeko ampilna on·titisanjokchim. Indakmitingo a·palo senge dongenggipa ripengtang chanapbae bobilko mil·amchi sko sotataha. Indakesa jenten ua pante sko man·baaha. Uamang indake rasongna sko am·e basakobade janggitangkon galpilrongachim !

A·chikrang songsa songgipin baksa aro a·king ge·sa ge·gipin baksaba pangnan dakgrik·den·grik·rongaha. Unbaksaba a·gittal manderangkoba uamang den·rongachim. Uni giminan skangode gipin jatrang A·chik a·songo napna namen kena·chim. Uamang bobil dinge ame ba chee re·baode chel·aonin rasong dake aro gaora de·e a·bokatachim. Unon songo dongsoenggipa me·chikrang meseng·rangko me·dik·sam·dikrango ritsoachim. Matgrik·rang sokbarin an·chi pekako namatna gita mande skorangko galbrake meseng bitchiko ra·dingdange ringtokachim. Bobil dinganio amatako man·baode uamang ka·a amgija re·bapilrongachim. Uamang re·bapilmitingo ramasamni bolchongdikrang, wa·a bolrang aro samrang kningribik dakbapilachim. Ka·a amjae, "indake ga·tingatna man·osaming" ine ramasamni bolchngdikko ga·tingbaachim. Mil·amko enge "indake den·atna man·osaming" ine ramasamni wa·a bolrangko den·atachim. Uni giminsa ama

man·baode ramani samtangtangchin sam bolrang  
aro bolchongdikrang bnekbarongachim.

Songo nokma sion nokkolko den·chapatna  
man·jaode songgipinni mandeko ba a·pal jolni gipin  
jat mandeko den·rongachim. Basakobade song  
chel·jaode mande bimang gimikkon chile rābaa-  
chim; ba indake dakna chol ong·jaode skorarako  
ra·baia. Mande bimang gimikkon chilbaode uko  
ganchio done uko wilwile chroktokachim. Unikode  
den·e ra·bagipa mandeni jak ja·arangko den·tong-  
tonga. Unikode den·sotsotgimin ja·a jakrangko  
songsamchi ra·ange a·kol cho·e dape gala aro uno  
uamang mandalko ge·a. Basakobade jakrangko gope  
galani pal uamang wa·ako songe jaksirangko  
badalate kachape dona aro uko songo napram  
ramadilo songe donronga. Ian a·gittalrang songo  
napode indake den·ako man·gen ine mikrakatani  
ong·achim. Dongrikenggipa bangki be·enko ganchio  
so·a aro skokode kaldiko kadingdee dona.

A·jak sokgriknakode A·chikrang dolgnian meseng  
bolko ge·achim. Unon jean chol man·chenga sko  
sote meseng bitchi baksa an·chiko brine ringna  
ku·mikchetachim. Je dolan bobilgipako a·jak sokna  
man·chenga, ua sko sote, skoko meseng baksa  
ritchape bitchiko ringachim. Indake a·jak sokna  
man·osa meseng bolko den·pee galachim. Indagipa  
a·jak soka·niko chasongsao man·angjaode chasong  
gipinona donangachim.

A'chikrang skangode indake janggi tanggipa manderang ong'achim. Janggitangna chanchigija uamang rasongko am'achim. Uamangni ka'dongani aro jatangna aro a'kingtangna ka'saani an'chingna skiani ong'china.

## RANTA KA'ANIRANG 17

### 1. Sing'anirang :

- (a) A'chikrang skango maidakgipa manderang ong'achim ?
- (b) Uamang a'pal jolo donggipa gipin jatrangko maina sko sotaha ?
- (c) A'chikrang maina mande sko am'a ?
- (d) A'chikrang maidake a'jak sokachim ?

### 2. A'chikrangni sko sotani gimin lessono pangchake sebo.

### 3. Bangbanggiparango katta jikseko gapatbo :

- (a) Gam'a- — — — — ; (b) Grika- — — — — ;
- (c) Chel'a- — — — — ; (d) Janggi- — — — — ;
- (e) — — — — -rita ; (f) Den'grik- — — — — .

### 4. Ka'mao on'sogipa kattarangko jakkale sentence rikbo :—

- (a) A'jak soka ; (b) A'jak rima ; (c) Kaldik ;
- (d) Grika-torea ; (e) Matgrik ; (f) Mikkim.

## LESSON 18

RINGRING GANTI

---

1. A·bri a·kong tangsekgilgil pilak a·barangba,  
An·sengbea nitoriri nie rona nama ;  
Chanchiama gisiktango nike uarangko,  
Gitchak rimit balenggipa pilak bibalrangko.
2. Aiao maikai ong·ataha Nokgipa Isolba !  
Dingtangmancha seokaha somoiko u·mangna ;  
Kraa da·nang ring·gipana jo·ong gukrangba,  
Knatoe ku·rang sale ganti chenggariba.
3. Simdimdim burung bolgrim a·bimandurango,  
Tangsekgilgil ge·enggipa mirangba a·palo,  
Katchabea do' bijarangba oppana bibálko,  
Koribok balenggipa me·gong bibalrangko.
4. Bimangchi chonbea na·a, nio nikna neng·a,  
Ku·rangde knatoa aiao mairongpila ;  
On·bo gisik angnaba katchae ring·pana,  
Ka·siri ring·enggipa Ringring Ganti baksa.
5. Batangahaon ding·kari nang·ni ring·kuani,  
Re·baa ang' gisiko nang·na chanchiani ;  
Man·taigenma knataina burung bolgrimrango,  
Ka·sirokrok Ku·rang sale ring·a gitrangko.

— S. R. Marak, Mallangkona.

## RANTA KA·ANIRANG 18

1. Poedo segipa maina Ganti Chenggariko namnika?
2. Ganti Chenggari badia somoio git ring'a ?
3. Ia poedoni podrangko nang-ni gisikoniko mingbo aro sebo.



## LESSON 19

## PYGMY JAT

---

Pygmyrang chengonin dongaha ine chanchi-chipna man'a. Uamang da'aloba Africa a'songni bijangchi jolrango dongengkua. Mandeni jato uamangan kangalbatgiparang aro skia man'jabat-sranggiparang ong'a. Bang'gija songregiparangsang uamangko nikmanaha.

Africao donggipa gipin jatrang Pygmyrangde salgini askirang baksa agangrikna man'a ine bebera'a. Uamangan wa'al aro silko man'chenggiparang ine aganani gnang. Pygmy jatni ong'baaniko uamango sing'ode, "chinga a'gilsakko wakki do'ki ga'dapchenggiparang" ine uamang aganchakrongachim.

A'gilsakni jatrangni gisepo Pygmyrang an agangrikna aro indakachi uamang baksa ma'sigrik-aniona sokbana namen neng'achim. French Equatorial Africao uamang sak 20,000 mang da'oba dongengkua. Uamangni dongramode rama chel'bee re'angoba mamung saloba Pygmy saksakoba grong-jachim; aro badiaba biapo dongnue jinma sriksrik nirikenga inede uina man'achim.

Pygmyrang mande bakandika, indiba uamangan a'gilsako ka namjabatgipa manderang ong'skaa. Uamang chubegipa a'brini kurchotango aro a'kongkeprango dongronga. Uamang budurango jingjingtee, bol cheksirango aro bolrango makkre-rang gita malroroe re'na man'a; aro dikdiksani gisepon chel'prete re'angna man'aiachim. Chasongni chasongna mandeskachi sikar ka'ako man'e an'tangtangni janggiko jokatani mingsamangmang cholde dongnuani ong'achim. Iani giminsa uamang dongnuna namen changa.

Pygmyrang mande bonerangba ong'ja aro Negro-rangba ong'taijachim. Uaimang mande chontelaiasa. Uamangni an'gil a'mangni rong baksa gitchak brina.



Uamangni changrobewal meter 1 cm. 20 mangsan ong·rongaia. Africani Congo jolo donggiparangde cm. 92 mangsan changrosrangaiachim.

Uamangni mikkangrang Negrorangonide ding-tanga. Uamangni mikkang dalgapa aro mikron ka·mani greng chudoe miksimalikon nangdikena am·pila. Kursik dal·oba kurchilrangde dal·taija.

Uamangni wagamrang namnama aro namen raka. Uamang settuoniko tarigipa gulikode wagamchi chike napongatna altuen man·aia. Mande bakandik·oba uamangni jakrang Europeni. manderangni jakrangnade namen ro·batskaachim. Ja·arang kan·dikoba namen mandena kraa aro mikronrangde nina namen nitoa.

Pygmyrang sikar ka·na aro na·tok rim·na namen changsranga. Uamang chri aro brarangko jakkal·naba namen changa. A·gilsak gimikni uigijagipa bisirangkoba uamang jakkalna uiachim. Australiao donggipa Pygmy jatde boomerang minggipa silchidareko jakkala. Uara bobilchi goatoba nokgrip·aonan tang·bapilaiachim. Me·asarang sikar ka·e cha·aniko am·a aro me·chikrang noko donge kam ka·a. Uamang bolko a·kol pue uno go·olko sikate natsiksike wa·alko bikota aro chengonin indake wa·alko bikotbaengachim.

Pygmyrang ka·namgijagipa jat ong·oba an·tang-tangni gisepode mamung saloba dakgrikja. Saoba

sakoba maibakai su·manode ba matatbu·atode  
mongma manggnikoson gamna nangaia.

## RANTA KA·ANIRANG 19

### 1. Sing·anirang :

- (a) Pygmy jat a·gilsakni badia biapo dongengkua ?
- (b) Pygmyrangko maina nikna neng'a ?
- (c) Uamang maidakgipa biaprango dongronga ?
- (d) Uamangni be·en bimang maidake ong'a ?
- (e) Uamang janggitangna mai kamrangko ka'a ?
- (f) Uamang wa·alko maikai bikota ?
- (g) Australiani Pygmyrang maidakgipa silchi·dareko jakkala ?

### 2. Pygmy jatni gimin lessono sea gita tale sebo.

### 3. Bangbanggiparango 'kragipa kattarangko gapat·bo :—

- (a) Australiani Pygmy jat \_ \_ \_ \_ \_ minggipa silchidareko jakkala.
- (b) Pygmyrang \_ \_ \_ \_ songdonga.
- (c) Uamang \_ \_ \_ budurango jingjingjee re'a.
- (d) Uamang \_ \_ \_ \_ changroa.
- (e) Uamang sakoba su·manode \_ \_ \_ manggni·ko gamna nanga.

### 4. Ka·mao on·sogipa kattarangko jakkale sentence rikbo :—

- (a) Wakki·do·ki ga·dapa ; (b) Wal·du ra'a ;
- (c) Gamna nanga.

## LESSON 20

### HUMAYUN

---



Babar an·tangni sina skang an·tangni dal·batgipa depante Humayunko okame una aganaha, "Angde, Isol nang·na ka·sae angni songnokko on·rikode, nang·ni jongadarangna ka·sae dakchina anga nang·ko mol·molangenga." Humayun namgipa aro sontolgipa mande ong·e, pagipani agananggipa kattarangko namen maniaha. Ua an·tangni ba·riima·skarangna ka·sabeani gimin pagipani kattako manina neng·nikjaha. Ua nama aro sontolani giminan pagipa una namen ka·saachim.

Pagipa Babarni agane donanga gitan Humayun an·tangni songnokni Punjabko saksana aro Afgha·nistanko sakgipinna suale on·aha. Ia kamara ka·saani kam ong·oba namen gualo dakani ong·achim, maina nangan salo ua ia a·song damgnionikosa namnam·gipa aro bilakgipa sipairangko man·genchim. Uni jongdrangba namgiparang ong·jachim, aro chol man·ode adatangko so·ote songnokko ra·seknasa uamangba chanchitokaiachim.

Babar sina skang an·tangni songnokko tom·tom

aro mangrakate donangna man·jaha. Uni gimin Humayun raja ong·ahaon bang·a bobilrang baksa dakgrikna nangaha. Ua ka·donggipa mande ong·oba pagipa gitade ong·taijachim. Uni janggi tangani bon·kamachibara ua aping ba kanchako cha·aha aro indaken uan uni be·enko ong·siataha.

Humayunni chasongo saksa ka·rakgipa Afghan mande Bengalni Governor ong·engachim. Matchako tonualchi bilsa den·e siatani gimin uko "Sher Shah" ba "Matcha Pamong" ine bimung mingaha. Babarni siani ja·mano Sher Shahba an·tangko a·song gimikni raja dakna chanchiengachim. Ua bang·a bilakgipa sipairangko chimongaha. Ua Bengalni sepango donggipa killarangko ra·sektokaha.

Ua somoimiting Humayun gipin Afghan rajarang baksa dakgrike jakchakjaengachim. Uandake dakgriken ua bang·a Babarni chasongoni kakket bebe ong·e rajana dakchakenggipa bilakgipa aro ka·donggipa sipairangko gimaataha. Humayun Afghanistano raja ong·enggipa an·tangni jonggipako an·tangna adita sipairangko watatchina mol·molatahachim; indiba jonggipa iako dakna jechakaha. Indaken da·o Humayun baksa bang·gija aro name skiako man·gijagipa sipairangsan dongaiaha.

Afghan rajarangko amani ja·mano Humayun salaramchi bobil dakenggipa Sher Shahko dakgrikna re·chakatangaha. Ua somoio wachimiting ong·ani gimin pilakchin chirarachim, aro indake dakgriktojani gimin Sher Shah a·brirango donggipa killa-

rangona kate dongaha. Humayunni bang'a sipairang namen namjabegipa duko ga'akaha, aro bang'an saako man'e siaha. Mitamrang ka'onange uko wate katangaha.

Humayunna indakgipa namjabegipa obosta ong'aniko chol ra'e Sher Shah chadrapaha aro Humayunko dakgrikanio amaha. Sher Shah Delhi aro Agrako ra'sekaha, aro indake 1540 bilsio Hîndustanni raja ong'aha.

Humayun an'tangni jonggiparangni dakchakaniko da'o am'aha, indiba darangba una dakchakjaha. Batesa uko so'otpilna am'aha. Ua aro uni nokgimik adita ja'rikgiparang baksa bilsî gittamna brangjojona nangaha. Indiako watangna skang a'gisio una depante atchiaha. Mughal rajarangni bewalo gita depante dejakra atchion boksîs sualna nangachim. Indiba ua somoio Humayuno mamungba dongpajani gimin ua an'tangni jeponiko dangroke nion matchok ganduriko nikaha. Ua uko on'tiprak aktete an'tang baksa donggipa mande-rangna sualaha. Sualmitingo ua indake aganaha, "Ia matchok gandurini simila gita angni depante-koba pilakchin mingsingangchina."

Humayunni depante dejakra Akbarko wanggipa rim'gittange adita bilsirangna chipchange donaha. Humayun aro uni jikgipa adita ja'rikgiparang baksa Persiachi katangaha. Persiani raja uamangna ka'sae dakaha aro adita sipairangkoba on'aha. Ua sipairangko rimbite Afghanistanona re-bapile bilsî

chikungna jonggiparang baksa dakgrike bon·kamao uamangko amsrangaha. Indake Humayun Kabulo adita bilsina sason ka·aha.

Sher Shah ruute Hindustanni raja ong·angna man·jaha. Uko ja·chongrikgipa rajarangoni gittamgipa namen bilgriachim. Iako nike Humayun Delhiko ra·sekna re·bapilataiaha, aro dakgrikanio chegipa ong·aha. Ua da·o an·tangni gimaatgimin songnokko bilsa chi·bongani ja·mano man·pilitaiaha.

Songnoktangko man·pilani ja·mano Humayunba ruute raja ong·angna chol man·jaha. Salsao ua nokni jang·keko gadomitingo ga·soltape ga·akaha aro biljime saknaako man·aha. Unonin pa·sikjole ua sae ruutgijan siaha.

## RANTA KA·ANIRANG 20

### 1. Sing·anirang :

- (a) Humayun sani depante ong·achim ?
- (b) Sina skang pagipa una maiko aganangaha ?
- (c) Humayun maidakgipa mande ong·achim ?
- (d) Ua jongdrangna mai ka·saani kamko dakaha ?
- (e) Sher Shahko maina "Sher Shah" mingaha ?
- (f) Ua maikai Humayunni songnokko ra·sekaha ?
- (g) Humayun ja·mano songnoktangko maikai man·pilaha ?

### 2. Humayunni gimin lessono pangchake kan·dike sebo.

3. Bangbango kragipa kattarangko gapatbo :
- (a) Noko bi·sa atchichenggipako \_ \_ \_ minga.
  - (b) Noko bi·sa ba·chotgipako \_ \_ \_ \_ minga.
  - (c) Bi·sa man·ako \_ \_ \_ \_ minga.
  - (d) Bia ka·gimin me·asako \_ \_ \_ \_ minga.
  - (e) Pagipa siani ja·mano depante raja ong·rikode uko \_ \_ \_ \_ minga.

## LESSON 21

### MEGHALAYA

---

1. Skon' kosak salgi rikrak  
 Uno ino joka chimik  
 Duuljok tangsek a·brirangchi  
 Diltugipa burungrangchi ;  
 Indakgipa nitogipa  
 Biap ong·a Meghalaya.
2. Bolgrimrango do·drang ring·a  
 Bibal rongrang ka·srokata :  
 Aram mesaa·a·bri baksa  
 Balwa bolni cheksi baksa ;

Indakgipa nambegipa  
Biap ong'a Meghalaya.

3. Pilak jatrang songdong-a·chaa  
Soksan cha·gipa gita :  
Krimkro rake kamko ka·a  
A·song silgniina ;  
Uan ong'a Meghalaya  
Biap chingni ka·sagipa.

## RANTA KA·ANIRANG 21

1. Ia poedoni podrangko nang·ni gisikoniko sebo ?
2. Meghalaya A·song maidakgipa ong'a ine ia poedoo aganaha ?
3. Ka·mao on·sogimin kattarangko jakkale sentence rikbo :  
(a) Krimkro ; (b) Mesaa ; (c) Songdong<sup>\*</sup>-a·chaa ;  
(d) Diltua.



## LESSON 22

## A'GILSAKKO DAKA

A'chikrangba a'gilsakko ba'gipa chi'gipa donga ine debera'a. Chengode a'gilsakara porongrong dakaiachim. Uni kosakoara chirarasanchim. Sal aro jajongba dongkujani gimin andalmikmik dakaiachim.

Dakgipa-Rugipa, Tatara-Rabuga a'ako ba'china Nostu-Nopantuko watataha. Nostu-Nopantu a'ako maikai ba'na man'gen chanchie nion man'jaha, maina dongchakchengnan biapan grichim. Ua skanggipa guangni chi kosako sringe dongengao dongechengpaaha. Uko nike Tatara-Rabuga ka'sachake adita an'chengko on'aha. Ia an'chengba mangrakjani gimin uano dongeba Nostu-Nopantu a'ako'ba'na man'jaha.

Indake ong'ani gimin Nostu-Nopantu a'steko chiningchiko ra'echina ang'keko watataha. Angke re'ange nion chi tu'beako nike kene katbapilaiaha. Unon ua Chipong-Nokma, Balpong-Gitel minggipako chiningchiniko a'steko ra'echina watatskaaha. Uaban chinan kenjagoke katbapilaiaha. Bon'kame ua Chingching-Balching minggipako watataha. Ua chiningchi re'ange adita a'ako romrome ra'baaha. Indakesa Nostu-Nopantu a'ako ba'na man'aha.

Uni ba·gimin a·akon Mane Pilte ine bimung donaha. A·ani bimang rong·dotma gita totgni dakachim. Ia bimangrangerarakujani gimin jingjo jingjo dakeiengachim. Indake ong·ani gimin Nostu-Nopantu Dakgipa-Rugipao uarangko namatchina mol·molaha. Uni mol·mola gitan Dakgipa-Rugipaba sal aro jajongko donaha, aro untalsa a·a mangrakba-aha.

Tatara-Rabuga a·gilsakna seng·kiko, sko kaping-nara aramko, kninara dal·dalgipa aro chubegipa bolrangko aro gana-chinani palara kasi, tilu aro indake chonchongipa sam, bol aro samku·simang-rangko on·aha.

Tatara-Rabuga a·gilsako donggipa pilak do·mat-rangkoba ong·ataha. Pilakna somoiko uiatchina sireng rurampa, do·mesal aro huroko donaha. Chio janggi tanggiparangkoba ua ong·ataha. Beng·blokko mikka wanasiako a·gilsakna paraksochina donaha.

A·ara chio balboe dongachim, aro uandake a·ani kosakode chian dongjachim. Uni gimin Tatara-Rabuga Nore-Chire, Kimre-Bokreko a·ao chimik-rang, chiringrang aro chibimarangko jokatchina aganaha.

Indake a·gilsakko Dakgipa-Rugipa, Tatara-Rabugani daka ba ong·ata chu·soksrangaha.

#### RANTA KA·ANIRANG 22

##### 1. Ortorang :

- (a) Dakgipa-Rugipa, Tatara-Rabuga \_\_\_\_ Pilak-kon ong·atgipa bilgnanggipa mite :

- (b) Chipong-Nokma, Balpong-Gitel \_\_\_\_ Ang'ke chongipa ;
- (c) Chingching-Balching \_\_\_\_ Ki'chil ;
- (d) Sireng ruram \_\_\_\_ do'bipa ;
- (e) Nore-Chire, Kimre-Bokre \_\_\_\_ Mikkani ma'a ba ama.

2. Sing'anirang :

- (a) Dakgipa-Rugipa, Tatara-Rabuga sawa ?
- (b) A'gilsakni bimangara skango maidake ong'achim ?
- (c) A'gilsakko ba'china sako Dakgipa-Rugipa watataha ?
- (d) Chiningchi a'steko ra'echina sako sako watataha, aro sawa uko man bachotaha ?
- (e) A'gilsakko A'chikrang badine skango mingachim ?

3. Bangbanggiparango kujikserangko gapatbo :

- (a) Ba'a-\_\_\_\_\_ ; (b) Dakgipa-\_\_\_\_\_ ;
- (c) Gana-\_\_\_\_\_ ; (d) Chiring-\_\_\_\_\_ ;
- (e) A'o malgipa-Chio \_\_\_\_\_.

4. A'gilsakko maikai dakaha, A'chikrangni agana-niko ia lessono pangchake sebo.

## LESSON 23

GITELNI KATTA

---

Germanyni songjinma damsani gopramo ro'ongko kite gitchambegipa sea gnang. Ua kattarang indake ong'achim :

Ka'mao sea gita Kristo, an'chingni Gitel, an'chingna agana :

Na'simang angko Gitel ine minga, indiba angko manija ;

Na'simang angko Seng'a ine minga, indiba angko nikja ;

Na'simang angko Rama ine minga, indiba angko re'ja ;

Na'simang angko Janggi ine minga, indiba angko man'na sikja ;

Na'simang angko Uigipa ine minga, indiba angko ja'rikja ;

Na'simang angko Mangnama ine minga, indiba angna ka'saja ;

Na'simang angko Gamgnang ine minga, indiba angko bi'ja ;

Na'simang angko Jringjrotna Donggipa ine minga, indiba angko am'ja ;

Na'simang angko Ka'sachakgipa ine minga, indiba angko pangchakja ;

Na·simang angko Mandera·ani ine minga,  
indiba angna dangdike on ja ;

Na·simang angko Bilakbegipa ine minga, indiba  
angko mandera·ja ;

Na·simang angko Kakketgipa ine minga, indiba  
angna kenja ;

Anga na·simangko dos gnang ine inoba, angko  
matnangpilnabe

## RANTA KA·ANIRANG 23

1. Lessono mesoka gita Isolni dingtang dingtang  
gunrangko sulsul sebo.
2. Bangbanggiparango kragipa kattarangko gapat-  
bo :
  - (a) Isol \_\_\_\_\_ ong·a, indiba an·ching uko nikja.
  - (b) Isol \_\_\_\_\_ ong·a, indiba an·ching uko re·ja.
  - (c) Isol \_\_\_\_\_ ong·a, indiba an·ching uko am·ja.
  - (d) Isol \_\_\_\_\_ ong·a, indiba an·ching uko man·na  
sikja.
  - (e) Isol \_\_\_\_\_ ong·a, indiba an·ching uko  
mandera·ja.





## LESSON 24

### NONGKREM CHROKANI

---

Indiani salgro-salaram a·doko songdonggipa a·brini jatrangko uamangni chrokani, ring·ani aro uandake jatni ma·manti dakbewalrangni gimin a·songo mingsinga. Bang·a indakgipa chrok-mesa-anirang jatni bebera·ani ba toromo nangchapa.

Khasirang Meghalaya A·songni mongsonggipa jatsa ong·e uamangni jatni dakbewalrangkoba Meghalayao janggi tangbringipa jatska uie ra·chong-motna nanga. Khasirangoba uamangni jatni bebera·ani ba torom gnan. Uandake uamangni isolrangko maniani somoirango uamangba chrok-mesaanirangko dakronga.

Nongkrem chrokaniko wachikario ong·atranga. Iako Nongkrem songon sal bongaba kingking joljol ong·ata. Ian Kristian ong·gijagipa Khasirangni dal·batsranggipa chrokani ong·a.

Ia chrokani salo kamalrang dintang dintang boli on·anirangko daka. Uamangni isolrangba do·o

matni an'chiko am'a aro uni gimin indakgipa janggi gnanggiparangko so'ote uarangni an'chiko isolrangna on'a. Ua salo uamang manderangna gamko, an'senganiko aro ma'mantiko patichina uamangni isolrango bi'a.

Khasirang ian dal'begipa maniani ong'ani gimin chrokchakgipa biapko namen taria aro nitoata Chrokchakgipa biapko pulni bimang gita nitobee taria. Rani me'tra isolko olakkiram aro boli on'ram biaponi nitobee gane-chine re'ongkatbaa. Unon sakgipin me'trarangba namnambee tarie raniko damsan ja'rikbaa. Chrokgipa me'trarang gamchatgipa ripokrang aro naderangko gana. Me'trarang jakko songone, a'achiko nikome, ka'sne ja'si ku'chotchi ga'e chrokanga. Uamangko me'asarang dongduule jakrachi tonual aro jakasichi danilko ra'a chroka. Ian bilgrigipa me'chikrangko bilakwa'sagipa me'asarang do'reng gakasian salo matcha elbikbikan somoio naljokatna tarianiko mesoka ine agana. Dokgipa-damgiparang chrokgiparangna doktima aro chrokgiparang uarangni sulrangna ma'rap ma'rap chrokanga.

## RANTA KA'ANIRANG 24

### 1. Sing'anirang :

- (a) Nongkrem badia jatni chrokani ong'a ?
- (b) Ia chrokaniko basako aro bano badita salna ong'atranga ?

- (c) Uamangni kamalrang maidake boli on'a ?  
 (d) Ua manianio uamang maiko uamangni isolrango bi'a ?  
 (e) Uamang maidake chroka ?
2. Nongkrem chrokani gimin lessono pangchake sebo.
3. Bangbanggiparango kragipa katta jiksearangko gapatbo :  
 (a) Chrok- \_\_\_\_\_ ; (b) Mingsing- \_\_\_\_\_ ;  
 (c) Songdong- \_\_\_\_\_ ; (d) Gam- \_\_\_\_\_ ;  
 (e) An'chi- \_\_\_\_\_ ; (f) Janggi- \_\_\_\_\_ ;  
 (g) Bilak- \_\_\_\_\_ ; (h) Doka- \_\_\_\_\_ ;  
 (i) Danil- \_\_\_\_\_
4. On'sogimin kattarangko ra'e sentence rikbo :—  
 (a) Do'reng gakasia, matcha elbikbika (Kenani sal) ; (b) Nade.

## LESSON 25

### NOSARI- BANDARI

---

A'chik A'songŋ bang'a mingsinggipa warirang, chibolrang aro a'brirang gnan. Nosari-Bandari uan A'chik A'songni salgipengchi Bugi chibimani wari damsa ong'a.



A'chik pagitchamrangni dilgipa saksa matgrik Abong-Noga A'chikrangko da'o songdongenggipa A'chik A'songo napchengdilgipa ong'chim. Uko A'chikrang Abing Raja ineba minga. Abong-Noga aro uni jikgipa A'chik A'songo nape Nokrek a'brio songdong-a'chaaha. Ua uano songdonge a'barangko o'e game cha'aha. Da'alonaba uni Nokreko songdongani chinrang dongengkua.

Abong-Noga namen man'e cha'gipa mande ong'achim. Ua an'tangna game rim'e on'china nokkol sak hajalsako rakkiachim. Ua uni matchurangko Metongbolosa jilatachim. Uni a'barangko mikronchi niwatsokpiljachim. Indaken nokkolrangko mesal cha'na okamode adil sikesa okamrongachim. Abong-Noga aro uni jikgipa Silme-Do'ka aro uamangni dedrang namen man'e cha'beaha. **Uamang mamung kamkoba jakdangdikgija noko tuari wangdate cha'na man'aiachim.** Uamangni tala, lota aro cha'chak-ringchakanirang sonanirara ong'ani giminan nokningon teng'chichippilachim. Uni a'bani mi misirangko nokkolrang rate-tete nioba aro meserang do'orang salang walang cha'oba bon'chakpiljachim.

Abongni a'bani mi misi minahaode nokkolrang salang walang on'tisaba ueng'takna man'jachim. Nokkolrang mirangko olbaon uamang an'tangtangan mi danao brangpilachim. Indaken salsaode mi olbagipa nokkolrang mi dangipao brangani gimin Abongni demechik Mine mi jamko mesokna

ine re-baaha. Indiba nokkolrang walang salang tuna man-jani gimin uko ka'onange mi pakdapsrangaha. Uandake Abongni mirangko danako chubugipa a'bri gita nikpilachim. Unasa uko Nokrek-Midan ming-aha.

Abong an-tangni demechik Mineko ja'rik-ja'sane nioba nikjatele biap namja ine chanchiaha. Indake ua an-tangni jik dedrangko rime a'palchiina katdon-angaha.

Uo 'depante sakbri gnangchim. Uamangara-Radera, Rajadera, Jangga-Gopela aro Selsela-Mol-mola. Uamang adasa sak bri pagipani galanggipa a'ako o'e cha'taina re'dobaaha. Uamang an-tang-tangni a'bao susagrike ge'aha. Indiba dal-batgipa adatang sakgninade mi misi nambrejaha; jinggipa sakgninasa mi misi nambatahachim. Iani a'sel uamang adasa ma'drangni gisepo gisik sagrikani aro mikbugrikani ong'aha.

Uamang sak bri uano ruuta bilsirangna dongang-kuode haida dal-bata golmal ong'naba donga ine chanchie uamang ua biapko wate katna tik ka'aha. Uamang an-tangtangni mal-mattarangko ra'e dal-batgipa adatang sakgni Radera aro Rajadera Simsang chibimako aro chonbatgipa jinggipa sakgni Bugi chibimako ringrango choonne chibima dilgni-ni braramo gronggirikna tik ka'aha. Radera aro Rajaderade chibimani braramona soke salsni walsni sengsoaha, indiba jinggipa sakgniko niksojaha. Jinggipa sakgni Jangga-Gopela aro Selsela-Mol-

mola Bugiko choonbaon mikka wadape chi dal'e Bandari wario ring dubie sripe siaha. Uandake uamang manchigimin biapona sokejaha. Adatang-rang jonggipa sakgniko nisooba niksojani gimin Bugiko ring chodobae nion jonggiparangni Bandari wario chi sripe siani chinkosan nikeaiaha. Uamang mamungkoba dakna chol ong'jae re'bapilna nangaiaha. Skangode ia Bandari wariko Nosal inesa mingachim, indiba Jangga-Gopela aro Selsela-Molmola adasa ring dubie siani ja'mano iako Ringkrip-adi, Bandari-wari ine mingskaaha. Indiba somoi ruutani ja'mano uko Nosari-Bandari ine mingaha aro da'alonaba ia apsan bimungchin uko mingengkua.

Ian Bugi chibimani warirangni gisepo tu'batgipa aro na'tok bang'batgipa ong'a. Ia wario ma'manti chini jo'ongrangba bang'en gnang. Da'oba ia wari uni mikkim rasong baksa dongengkua.

## RANTA KA'ANIRANG 25

### 1. Sing'anirang :

- (a) Abong-Noga sawachim ?
- (b) Uko A'chikrang bidine mingrongachim ?
- (c) Uni jikgipako mai minga ?
- (d) Uni demechikko mai minga ?
- (e) Abong-Noga maina Nokrekko wate katan-gaha ?

- (f) Maiko Nokrek-midan minga ?  
 (g) Abongni depanterangara sawarangchim ?
2. Nosari-Bandari maia ? Ia bimungara basakoni aro maikai ong'baaha, tale sebo.
3. Abong-Nogani man'e cha'ani gimin sebo.
4. Bangbanggiparango katta jikserangko gapatbo :  
 (a) Mingsing- \_\_\_\_\_ ; (b) Gama- \_\_\_\_\_ ;  
 (c) Tua- \_\_\_\_\_ ; (d) Rata- \_\_\_\_\_ ;  
 (e) Ja'rik- \_\_\_\_\_ ; (f) A'sel- \_\_\_\_\_ ;  
 (g) Mal- \_\_\_\_\_ ; (h) Ja'man- \_\_\_\_\_ .

## LESSON 26

### NAMGIJAGIPA MANDEDE

---

1. Namgijagipa mandede  
     Namgijakosa nika ;  
     Isolkomangba uade  
     An'tang gita nika ;  
     Ukomangba uade  
     Namja ine ina  
     An'tang namjaenba.

2. Namgijagipa mandede  
     Namja ine salgikoba ;  
     Ukoba nangja ina uade.  
     Kosakchi nigitoe  
     Salgikoan studapa.  
     Che ! Uan tang'onbataie  
     An'tangkoan ga'akdapa.
3. Namgijagipa mandede  
     Gipin mandeko taka ;  
     Pilakkon namja ina uade.  
     Aganna chonnike  
     Duga namja clake ;  
     Miktaka kal'stape,  
     An'tangkosan dal'nike.
4. Namgijagipa mandede  
     Nikmanja namakode ;  
     An'tang ong'ronga gitan  
     Chanchia gipinkoban.  
     An'tang namgija gitan  
     Nika gipinkoban,  
     An'tang gita chachan.

— Rev. Gilbert K. Marak

## RANTA KA'ANIRANG 26

1. Ia poedoni podrangko nang'ni gisikoniko sebo.
2. Namgijagipa mandeni kam aro bewalrangni  
     gimin poedoo pangchake sebo.

## LESSON 27

### SONARAM R. SANGMA

---



Pilak a·songon mandetangni jakgitel ong·anina dakgrikdiligiparang ghang. A·chikrangni gisepoba jatangna aro mandetangna ka·sagiparang aro uamangko gipinchi nokkol itaoniko naljokatna kam ka·giparang ghang. Chisobibrao Britishrangko dakgrikdiligipa matgrik sakgni Togan Nengminja aro Gilsang Dalbotni gimin an·ching knaman·aha. Mandalgre songni matgrik Sanja Manda Sangmani giminba mitamrang knaha, indiba mitamrang kankuja. Sanja Nokmako Capt. Williamson bamat·chipna man·jaha. Uandake sandiangkuode jatna a·songna ka·sagipa . matgrikrangko bang·en man·angkugen.

Kosako janapgipa matgrikrang mil·am sepirang·chi bobilko dakgrikaha, indiba iano janapnasieng·gipa Sonaram R. Sangmade gipinrang gita silchi·darechi dakgrikjaha. Uade gisikni mil·amkosa enge British Sorkari baksa dakgrikskaaha. A·chikrang uko “Garo Raja” ineba minga. Uni kam changsao British Sorkariko aro A·chik A·song gimikkon jingjengataha.

Sonaram Klang G. Momin aro Chamre R. Sangmani depante ong'achim. Ua 1856 bilsimango Goalpara districtni Salpara songo atchiaha. Dedrang sakdokni gisepo uan gittamgipa ong'achim.

Ua dal'ahaosa uni songo skulko kuliahaha aro ua somoiosa ua skulko re'na a'bachengaha. Primary skulko matchote ua Turaona re'bae Normal Skulo poraieaha. Uko name pass ka'aha.

Poraia matchote Sonaram Gauhatio sipaini kamko ka'aha. Ua ia kamko namnikjae wate galé Santipur sōngo skigipani kamko ka'skaaha. Ua ia kamko ka'e kusi ong'jaha, maina ia kamara uko biapsano katate donachim. Uandake ua ia kamkoba wate mohorini kamko ka'skaaha. Ia kamko ka'on ua A'chik A'song gimikchin sokna chol man'aha, aro dingtang dingtang jolrangni dilgiparangkoba grongjolna chol ong'aha.

Mohori kam ka'mitingon Sonaram Britishrangni ma'manti dake A'chikrangko sinjetanikoba nikaha. Ua Britishrangni A'chikrangko begal rim'aniko namen namnikjaha. A'chikrang Britishrangna uamangni moposol re'mitingo bosturangko indin cnile on'na nangachim. Unbaksaba sorokrangko cho'atoba una tangkarangko on'jachim. Minggipin-ara a'ba cha'ani burung bolgrimrangko a'ba cha'na on'gija ripinge donani ong'achim. Sonaram iarangko ra'galchina Sorkario dabiaha, indiba uni bi'anina Sorkari gisik on'jaha.

Sonaram da'o Sorkarini kamko wate jakgitel kam

ka'e cha'e British Sorkariko dakgrikna mangsongaha. Ua skanggipa tangkako chimongchengaha. Uni ja'mano Calcutta songjinmaona re'ange mingsinggipa ukilrangko gronge agangrikchengna chanchiaha. Indaken ua Calcuttaona songreangmitingo salsao Lakhipur ramao lekka kingsako nikaha. Uko kolame poraion Bijni Raja A'chikrangni a'kingko ra'seke ra'aha ine nike ka'onangbeaha.

Sonaram minggittam a'selrangni gimin da'o Sorkariko mokordoma ka'aha. Ua minggittam a'selrangara — 1) Begal rim'aniko dontongchina, 2) Burung bolgrimko a'ba cha'na on'gija dakaniko dontongchina aro 3) Bijni Rajani ra'sekgimin a'arangko on'pilchina. A'chikrang Sonaramko bilchi aro gamchi ia dakgrikanio dakchakaha. Sorkari iandake an'tangtango dakgrikpilanina chang chi'gnina Sonaramko patok donaha.

Uni indake ka'donge dakgrikdilanichi ua bang'a namgnirangko jatangna ra'baaha. A'chikrang sorokrango dormaha gri kam ka'na draaoni jokaha, aro begal rim'ako man'on una dormahako man'aha. Sorkari burungko ripingna a'a ra'anirangkoba dakdapangjaha.

Sonaram silchidarena bate bilakbatskagipa gisik aro budichi Sorkariko dakgrikaha. Jatangni nokkol ong'e donganiko uni mikronrang nikna man'achim! Ua an'tangko ia rakbegipa kamna on'kangaha, jedakode uni duk chakanichi jat jakgitel ong'gen.



Uni be'enni ja'dil dingantion jatna ka'saani an'chi-rang joka.

Sonaram be'enni sabisiko man'e 1916 bilsio siaha. Ua dongjahaoba aro uni chasongo uko jatko re'sretldilgipa ine mitamrang aganoba, da'o uni kamrangko sandie nion ua pilakan jatangna ka'saani kam ong'chongmota ine darangan nikna man'gen. Uni kamrang jringjrotna A'chikrangni ka'tongo donggen.

## RANTA KA'ANIRANG 27

### 1. Sing'anirang :

- (a) Sonaram sawa aro bano basako atchiaha ?
- (b) Ua badia biaprango poraiaha ?
- (c) Ua maimai kamrangko ka'aha ?
- (d) Ua mai a'selrangni gimin Sorkari baksa dakgrikaha ?
- (e) Ua maidakgipa silchidarechi dakgrikaha ?
- (f) Uko Sorkari maikai sasti on'aha ?
- (g) Ua mai namgnirangko jatangna man'e on'aha ?
- (h) Ua basako siaha ?

### 2. Sonaram maikai A'chikrangko nokkol itaoniko naljokatna kam ka'aha ?

### 3. Lessono janapgipa A'chik matgrikrangni bimungrangko sebo.

4. Bangbanggiparango kragipa kattarangko gapatbo :
- (a) Sonaram \_ \_ \_ bilsimango \_ \_ \_ songo atchiaha.
  - (b) Primary skulko matchote ua \_ \_ \_ poraiaha.
  - (c) A'chikrang uko. \_ \_ \_ \_ ineba minga.
  - (d) Sonaramko Sorkari \_ \_ \_ patok donataha.
  - (e) Ua \_ \_ \_ \_ bilsio siaha.
5. Bangbanggiparango ku'jikseko gapatbo :
- (a) Gisep- \_ \_ \_ \_ ; (b) Gipin- \_ \_ \_ \_ ;
  - (c) \_ \_ \_ \_ -Ja'dil ; (d) \_ \_ \_ \_ -bubi ;
  - (e) Sabisi- \_ \_ \_ \_ ; (f) A'song- \_ \_ \_ \_ .

## LESSON 28

### JAJONGONA SONGREANI

---

Jajongona songreani gimin changsao mande jumangmangba nikjachim. Bang'a jatrangan jajongko mite me'chik gita chanesa olakkitokachim. A'chikrangba uko Susime ine bimung done una krita manianirangko daka. Bang'a poedo segiparang uko nigitoe namnamgipa poedorangko semanaha.

1969 ni July 21 tariko aiao inmanbegipa kamko mande chu'sokatna man'aha. Amricani mande

sakgittam, Neil Amstrong, Edwin Aldrin aro Michael Collins jajongona songreangaha. Uamang-  
oni sakgni Neil Amstrong aro Edwin Aldrin  
jajongo ong'one uano re'roroe robana man'aha.

Jajongona watatna chanchion bang'a neng'nikani-  
rang aro jajrenganirang ghang.

Jajong a'gilsakni 386400 km. chel'aosa wilwile  
dongengani gimin maidakgipa bilgipako tarie  
unona sokatna man'genchim ! Indake bilgipa kolko  
tarina aro uko a'gilsakona ra'onbapilna gita namen  
rakgipa kam ong'genchim.

Bilangmitingo a'gilsakni orbit ba ramako maikai  
batsotangna man'gen aro uandake a'gilsakni  
salrikenggipa bilko chilprete maikai re'angna  
man'gen, namen neng'ani ong'genchim !

Iarangko man'genchim ong'oba bangbango  
ga'akenggipa hajalni hajal bilenggipa askirangoni  
rongsamang chatingeoba jajongona re'angenggipa  
rocketko bnekatgenchim.

Ia pilak neng'nikanirangko ame bilangna gita  
mandeo chu'onge gisik ghang aro indake an'tango  
donggipa taningko saksele mande kam ka'ahaoa  
mamung neng'nikaniba uko champengrikna man-  
jaha !

Jajongona sokna krenganiko scientistrang bilakro-  
robatataha. Uamangni rocketrangko uamang  
nambatrroe tarie chel'batroroe watataha. Skanggipa  
uamang jajongona sokatna jotton ka'aha, aro uno

chur'sokaha. Unikode uamang jajongo rocketko ka'sne ong'onatna jotton ka'aha; aro unoba chur'sok-na man'aha. Unikode jajongko wilwile a'gilsakona rocketko re'babilatnaba uamang man'aha.

Indake uibegipa scientistrang dlingtang dlingtang uamangni dake nianirango chur'sokaniko nikahaon, jedakeba uamang mandeko jajongona watatna mangnok ine chanchiaha. Uamang daro bilakbatgipa aro nambatgipa Rocket Saturn V minggipako tariaha. Ua rocketan jajongona bilangnasienggipa Apollo 11 ko a'gilsakoniko tang'dodilange bangbango gopretroroate jajongona tang'atanggenchim. Indakgipa bildilgipa kolni jriani a'bachengode ton 3,100 ong'pilachim. Rocket bilon ki'sangchipak gopretroroe uko tarakbatata aro gopretgimin bakrangde bangbango dongrikaia. Jarmano a'gil-sakona sokbapilode indake dal'begipa aro jrimbe-gipa rocketni bakrang rama tong'sao bon'rike mande dongchakgipa dringmangmangsan bangki dongai-aha, jean ton 6-san jrimaijok !

Indakgipa rocketko America a'songni Cape Kennedy minggipa watatchakram biaponi 1969 ni July 16 tariko watdoataha. Songreani chur'sokgipa ong'na gita mingsinggipa scientistrang dolni dol dlingtang dlingtang kamrangko a'bachengaoni bon'chotaona kingking kam ka'aha.

Uamangoni dolsara Apollo 11 aro Saturn V-ni hajalni hajal kolni bakrang tik ong'e kam ka'engama ka'jaenga uko niroke kam ka'china manderangko

donaha. Dolgipinara jajongchina re'anggipa mande-rangni be'enni bakrang mai ong'enga uarangkoba nirokaha. Dolgipin jajongona bilanggipa mande-rangna maikai bilna nanga uko uamang baksa agangrike skiroroataha.

A'gilsakko wate bilangan salbongao ia manderang 1969 ni July 21 tariko jajongona sokeaha. Unon chongipa rocket, jekon lunar module mingachim, Armstrong aro Aldrin bilonange jajongo ong'on-chengaha. Michael Collins ma'gipa rocketo dongrike jajongko bilwenwene sengsoaha.

Jajongo ong'onani ja'mano uamang konta 10 mangna neng'takchengaha. Uni ja'mano Armstrong lunar module-oni ong'kate jajongo ga'dapchengaha. Aldrinba ja'mano ong'kate jajongo nanga kam-rangko ka'aha. Uamang jajongo Americani nisanko songaha aro jajongni a'arangkoba ra'baaha. Uamang-ni jajongo re'jojoa gimik konta 2 minit 21 mang ong'achim.

Uamang jajongoni re'bapile 1969 ni July 24 salo a'gilsakona sokbapilaha. Ian a'gilsakna maironggipa katchaani ong'aha. Jekon mande changsao jumang inesan chanchiachim, ua salo be'en pilaha.

## RANTA KA·ANIRANG 28

### 1. Sing'anirang :

- (a) Jajongona sawarang basako songreangcheng-aha ?

- (b) Jajong a'gilsakona badita chel'ao wilwilenga ?
  - (c) Jajongona songrena maimai neng'nikani-rangko mande amchengna jotton ka'aha.
  - (d) Scientistrang rocketko maikai jajongona bilna maikai ta-rakbatroroataha.
  - (e) Mande sakgittam jajongona songreange maimai kamrangko ka'aha ?
  - (f) Uamang basako a'gilsakona sokbapilaha ?
2. Jajongona songreani gimin lessono pangchake kan'dike sebo.
3. Bangbanggiparango kragipa kattarangko gapat-bo :
- (a) Mande jajongona \_ \_ \_ bilsini \_ \_ \_ tariko sokeaha.
  - (b) Jajongona bildoanggipa rocketko \_ \_ \_ minga.
  - (c) Jajong a'gilsakoni \_ \_ \_ \_ chel'a.
  - (d) Jajongo ong'ongipa chongipa rocketko \_ \_ \_ minga.
  - (e) Jajongona bildoanggipa rocket \_ \_ \_ jria.

## LESSON 29

**MANGGISIKO SOATGIJA RAKKIANI**

Skangni chasongo Egyptni manderang sigimin mandeko soatgija name tarie rakkia. Ia indake tarie dongiminkon 'Mummy' ine minga. Ia katta Egypt ba Arab ku'sikoni ong'ja; indiba Persian katta 'Mummia' ingipaonisa ong'katchengaha. Ia kattani ortoara gisimgipa bostu ba algaatra ong'achim. Ruuta bilsirangna soatgija donahani gimin manggisiko gisime ba sime nika, aro iani rongko nika chengoni manderang manggisioni algaatra ong'bachengakon inc bebera'achim. Indake ruutgijan ia kattaoni 'Mummy' katta ong'katbaaha.

Manggisiko soatgija rakkianiko Egypt a'songo 2600 B.C. (Jisuni atchina skang)-oni a'bachengaha, aro uko 641 B.C. -ona kingking dakengkua. Ma'chong kolgriksagipa Pharaoni sason ka'ani somoirango manggisiko nambee tarie donna nambate man'achim, aro ua chasongo ia kamna sal sotsnimang somoiko nangrongachim.

Skanggipa mandeko soatgija rakkina okningni bakrangko ra'ongkatchenga. Ia bakrangko ra'ongkatna jakasichipakni kang'kare sambao 4 mm (inch 4) mang ratprake ra'ongkata. Ia ra'ongkatgimin okningni bakrangko chu aro similgipa moslarango dim'e su'srangchenga. Kolgranggipa okningkoba

eres boloniko bikotgimin tochi su'sranga. Ku'chok-gipa silchonggengrangko gingkol gita sikate taningkoba ota, aro ting'konggipa aro ro'gipa chamos dakgipachi skoni bikrokko sarokachim.

Rongtale su'galani ja'mano, ia okningni bakrangko karini ro'ong ginchio ba cha'ani soda aro su'galani soda bringimino ran'ningchina romrome dona. Iarang ran'ahaon, bibik, kan'chok, ka'prang ba uandake dingtang dingtang bakrangko dingtang dingtang katome okningo sikatpila. Okko cheprepe nikatjana gita a'dubek, bolratani biginchi, algatra, ba'ra suri ba jeko man'a okningo sike gangpudoate nitoe nikata.

Mikkang bimang gimikkon tangmitingo nika gita nitoe nikatnaba uamang ba'ra surirangko be'enni bigil ning'arango sikketkete dona.

Bon'kame manggisini ja'a, jak, sko aro bolgro gimikko ro'roe chitgimin ba'rachi remreme dona. Ia ba'rarangko dingtangmancha silongket boloni jokgipa attachi nongnongchenga. Name remeremani ja'manosa tarigimin manggisiko ma'drangna gopchina on'a. Ia manggisiko gadang gadang dake remremna ruuta somoirangko nanga, aro ian neng'batgipa kam ong'achim. Da'ororo basakoba uibegipa manderang remreme dongipa mummyko a'arangko ba rong'kolrangko bile remremna jakkalgipa ba'rarangko enge nion, ia ba'ra dingprakan 2.5 kilometer (1.5 mile) ong'e ro'a ine nikaha.



## RANTA KA'ANIRANG 29

## 1. Sing'anirang :

(a) Maiko "Mummy" minga aro iako badia a song dakrongaha ?

(b) Badia chasongo mummy-ko a bachengaha ?

(c) Mummy-ko tarina badita salrangko nanga ?

## 2. Manggisiko soatgija rakkiani gimin lessono pangchake tale sebo.

## 3. Bangbanggiparango kujikserangko gapatbo :

(a) Ja-man-\_\_\_\_\_ ; (b) Sia-\_\_\_\_\_ ;

(c) Rata-\_\_\_\_\_ ; (d) Rongtal-\_\_\_\_\_ ;

(e) Soa-\_\_\_\_\_ ; (f) Sika-\_\_\_\_\_ .

## LESSON 30

## SONGSULNA KA'SAANI

Demechik : (Salsao chongipa ki-tap kingsako poraie) Ama, iano "Angni Songsul Sawa?" ine sing'ani ortoara mai ?  
Songsulara sawa chongmot ?

Ma'gipa : Nono, "songsul" ine aganon, ian namen apala. Songsul ine aganon ian an'ching-

ni noksul ba an'chingni nokni wilwilao  
donggipararako miksongja.

**Demechik :** Indide, ama, an'chingni nokni chel'ao  
donggiparanga maikai an'chingni  
songsul ong'nok ?

**Ma'gipa :** Nono, noksul aro songsulni dingtang-  
grikani gnan. Noksul ine aganon, uan  
an'chingni nokni wilwilao donggipa-  
rangkomiksonga. Noksulrang an'ching-  
ni sepangbatsranggipa ma'drang.

**Demechik :** Ong'ja, ama, na'ade gualenga ; noksul-  
rangde an'chingni sepangbatgipa ma-  
drang ong'na ma'ja. An'chingni  
sepangbatgipa ma'drangde mama, ade,  
ajong aro pajongmaangsa.

**Ma'gipa :** Nono, na'ade bang'en uie ra'na nang-  
engkua. Nang'ni ajong pajongma-  
angde an'chingni chel'aosa donga.  
An'chingni noko maiba duk ba a'sel  
ong'ode, an'chingni noksulrangsa  
an'chingna skang dakchakgen. Ua-  
mangkosa an'ching pilakna skang  
okamgen. Nang'ni mama, mano, ma'de  
ma'jongrangkode ja'mansa kobor  
on'na man'aigen. Uni gimin skanggipa  
dakchakanikode an'ching noksuloni-  
kosa man'a. Indakani giminsa an'ching  
noksulko nanga aro uamang baksa

nangrime, ka·sagrike aro dakchakgrike dongna nanga. An·chingo dongpaode uni giminsa anga pangnan cha·ani ringani bosturangko an·chingni noksulrang baksa suale-ra·rone cha·rongenga, aro an·chingni noksulrangba an·chingna apsan dake indakgiparangko on'e cha·skaronga.

**Demechik :** Ama, anga noksulni gamchatanikode da'o ma·siaha. Indiba songsulara sawaska ?

**Ma·gipa :** An·chingni songsulrang an·ehingni ma·drang bakdrang, man'e cha·gipa manderang, an·chingni sepangjolo donggipa manderangmangmangko miksongja. Indiba iani miksonga namen apala. Songsulrang ine aganon an·chingni dakchakaniko jemangan nangengachim, uamangko miksonga. Cholgri apgri manderang, kangal cha·asigiparang aro indake ma·manti duko ga·akgiparang an·chingni songsulrang ong'a.

**Demechik :** Indiba, ama, angni nika gitade man'e cha·gipa manderangni noko mande siode ba bia ka·ode manderang bang'en re'a. Uamangni nokrango gilja ka·oba manderang bang'en re'a. Kangalrangni

nokrangonade gilja ka'omangmangba  
manderang re'ja. Iani a'selara mai ?

**Ma'gipa** : Nono, na'a jekon aganaha, uan bebean  
ong'a. Oe, an'ching manderango nok  
baseani bang'en gnang. Mitam mande-  
rang man'e cha'gipa manderangko  
ripeng daka aro uamangko namnikatna  
ma'manti kamrangko daka. Indake  
dakachi nangan salo uamangni, chong'-  
motan-man'e cha'giparangni dakchak-  
aniko man'skana ka'donga. Mitamara  
cha'na ringna man'anina uamangko  
ripeng daka aro uamangna kamchi aro  
gamchi dakchaka. Indiba ian namgipa  
kam ong'ja !

**Demechik** : Indide maiasa namgipa kam ong'gen ?

**Ma'gipa** : An'ching sanaba dakchakon uoniko  
maikoba man'pilna ka'donge dakchak-  
na nangja. Maibako man'pilna mik-  
songesa na'a dakchakode uan gisik  
sronge aro una ka'sae dakchakani  
ong'ja. Kangal cholgrirang, jemangan  
chasongnaba an'chingna dakchakskana  
amjawa, aro jemangan an'chingni  
dakchakaniko nangenga, uamang an-  
chingni songsulrang ong'a.

**Demechik** : Indide bi'amgiparangba an'chingni  
songsulrangma ?

**Ma·gipa** : Oe, nono ; jakkora, ja·kora aro mikgri-rang pilakan cholgrigiparang ong'a, aro uamang an·chingni dikchakani-rangko nangenga.

**Demechik** : Indiba ama, angade ua gipin jatrang-nade ka·sana man·jawa aro uamang-kode songsul inen channan sikjawade !

**Ma·gipa** : Ong·ja, nono ; na·ade ianoba dal·en gualenga. An·ching mandeskana jat baseani grian ka·sana aro dakchakna nanga Jatsa jatgipin baksa mitchigrike janggi tangode indide an·chingni gisepo tom·tomani dongjawa. Jatsa jatgipinni gisepo mitchingrikani aro meligrikigijanirang dongode iarang dakgrikani, so·otgrikani aro indakgipa golmalrangko ong·katatgen. Uni gimin mandeskana jat basegija ka·sana aro dakchakna nanga. Gipin jatba nang·ni songsul ong·na man'a.

**Demechik** : Ama, anga da·o angni noksul aro song-sul sawachim, name tale uiaha.

**Ma·gipa** : Nono, na·a iarangko uimangmange donainabe. Na·a nang·ni janggi tang-anio iarango pangchakbo. Indake janggi tangode na·a songsalo saksa jakkaltogipa mande ong·gen.

**Demechik :** De ama, anga indaken janggi tangna jotton ka'gen.

## RANTA KA'ANIRANG 30

### 1. Sing'anirang :

- (a) Lessono janapa gita noksulara sawa ?
- (b) Noksulara badita kingking an'chingna gamchata ?
- (c) Songsul sawa ?
- (d) Maina jatsa jatgipin baksa ka'sagrikna aro meligrikna nanga ?

### 2. An'chingni noksul aro songsulni gimin lessono pangchake sebo.

### 3. Bangbanggiparango ku'jikserangko gapatbo :

- (a) Suala-\_\_\_\_\_ ; (b) Ma'drang-\_\_\_\_\_ ;
- (c) Cholgri-\_\_\_\_\_ ; (d) Mikneng-\_\_\_\_\_

## LESSON 31

## BIDANI CHIMIKKO RINGGEN

- 1. Maini ku'rang knasoenga,  
Chel'beoni gita ;

- Ka·sri ka·sri gam·baenga  
Knal moa gita.
2. Sepangbao uiaha,  
Bidani chimiksa ;  
A·chik songna jokbaaha,  
Bidan' chimik dilsa.
3. A·chik mande ringpaaha  
Gipin didiachi ;  
Ringmanoa uiaha  
Sokja bijan bitchi.
4. Bidan' angko naljokatjok,  
P'lak dukoniko ;  
Uan angko seng·atpajok  
Goka ong·aoniko.
5. Bidan' cholguga angna  
P'lak kamo dakna ;  
Ka·dongna jakgitelna  
Bidan' gunchi chena.
6. Ringkugen Bidani chimik  
Detangnaba on·gen ;  
Ka·donga A·chik gimik  
Bidan' chimikko ringgen.

— Arabindro K. Sangma.

### RANTA KA·ANIRANG 31

1. Ia poedoo maiko poedo segipa aganenga?  
Talatbo.

2. Ia poedoni podrangko nang'ni gisikoniko sebo.
3. Dingtanggrikaniko mesokna sentencerangko rikbo :
  - (a) Ringa ; ring'a. (b) Gama ; gam'a.
  - (c) Songa ; song'a. (d) Senga ; seŋg'a.

## LESSON 32

**GANDHINI SALGIPENGNI  
AFRICA O KAM KA'ANI**


Mohandas Karamchand Gandhi 1869 ni October 2 tariko Kathiawarni chongipa songjinma Porbandaro atchiaha. Uni pagipa badinggipani doloni ong'achim, aro ua Kathiawarni Chief Minister gita chacha ong'achim.

Bi·samitingo Gandhi songni skulo poraiaha. Ua man·gipa bi·sa ong·pajachim. Kratcha·raka aro ka·pong ong·ani gimin ua mikkangchi dal·gipa mande ong·gen ine mamungba ka·dongsoani grisrangchim. Indake ong·oba ua bi·saonin kakket aro bebe ong·gipa mande ong·baaha. Salsao skul nigipa saheb saksa re·bae uni poraigipa skulko niaha. Skul nigipa bananko seate nion Gandhi uko



tik ong'e sena man·jaha. Skigipa Gandhichiko nie uko ripengskaoniko nie sechina chin dakataha. Indiba Gandhi namgijana an·piljaha.

1888 bilsio Gandhi ukilni kamko skie ra·na Englandchi re·angaha. Englando dongmitingo ua Hindurangni Sastro Bhagavad Gita-ko gisik nange poraiaha. Ua Kristiangrangni Rongtalgipa Sastrokoba poraina namnikbeaha. Uni namnikbatgipa bakranga Jisu Kristoni A·brio Skianirang ong·achim. jekon Mati Odhai 5, 6 aro 7 o poraina man·genchim. Ua "Ka·san' Seng'a Andalbemitingo" aro "Angmung Dongbo" ingipa Kristianrangni gitrangkoba namen namnikachim.

Gandhi 1891 ni June 11 salo ukil ong·aha. Ua Indiaona re·bapile Bombayo songdonge ukilni kamko ka·na chanchiaha. Indiba ua kamko jako ra·on ku·saba kacharion aganna man·jae kratcha·e katna nangaha. Indake ukilni kamo chu·sokgipa ong·jaengon uko Africao songdonggipa Muslim manderang an·tangtangko kachario chel·chakchina okamataha. Ua ia cholko ra·e Africaona jik deko rime re·angaha. Durban songjinmaoni Johanesburgona mingsa miokordomako dakdilna rel gario re·na gita ua First Class kuturini ticketko breaha. Indake re·angmitingo station ge·sao bigil gipok mande saksa relo gadoaha, aro ua Gandhi baksa apsan kuturio songrena nangachim. Ua bigil gipok mande namen namnikjaha, aro indake bigil gisim mande baksa songredimna man·jawa.ine ua

Railway Officerrangna ka'onange aganaha. Officer-rang Gandhiko Third Class kuturio songrechina aganon ua jechakaha. Uni gimin policerang re'bae Gandhiko salongkataha aro uni bosturangkoba ra'one galaha. Walgimik Gandhi sin'a chake a'palo ge'gipin rel garina sengna nangaha. Ua chasongo bigil gisim manderangde rel gario songreanirango First Class kuturirango re'pana niam dongja aro indake bigil gipok manderang baksa apsan gadango ong'pana mamung saloba man'pajachim. Uni a'selan Gandhikoba First Class kuturioniko a'rikgale galaha.

Gandhi salgipino songreanguaha. Ua Johanes-burgona gure gario re'angaha. Indiba ukode gari ning'ode asongpana on'jaha. Gure garini ning'o asongchakna kuturi tarigipaode bigil gipok manderangsang songretokengachim. Indake Gandhi a'palo gure gari chalaigipa baksasa asonge re'angpaaha. Unonikoba uko gure gari chalaigipa rikgale gale an'tangsa Gandhini biapo asonge Gandhikode ja'a ga'chakna dongipao asongskachina aganaha. Gandhi iako dakna jechakon ua Gandhiko namkalen dokaha aro uko gure garioniko jippake galatna jotton ka'aha. Gandhi garion rim'skape chakaha. Ja'mano gario gakatgipa bigil gipok manderangan ka'sachake gure gariko chalaigipa mandeko indake dakjachina beng'pilaha.

Transvaalo songdonggipa Indian manderangni obostarang namen namjasrangchim. Pilak gipin biapo donggipa Indianrangna bate uamangan

sinjetako man'bataha. Uamangde dal'gimin mande jean lekka pu'onani bilsa sokaha sakprako £ 3 ko kajina on'na nangachim. Uamang a'arangkoba brepana man'jaha aro attam 9 bajini ja'manode hukum gri sorokrango re'na man'jachim. Salsao Gandhiba President Krugerni nok sepangko re'pakangengmitingo nokko dongtingipa police saksa mamungkoba aganchenggija uko sorokchi ga'tingwatataha. Uko indake kragija dakako nike English officer saksa policeni kosako mokordoma dakchina aganaha. Indiba a'jak sokani an'tangni kam ong'ja ine Gandhi mamungkoba dakjaha.

Salgipeng Africao kamtango matchote Gandhi Indiaona re'bapilaha. Indiba 1896 ni November jao ua changsatai okamatpilako man'e uchin re'angpilataiaha. Indiba Africao donggipa bigil gipok manderang Gandhini India daka kamrangni gimin knasoe aro ua da'o jahas ge'sao gappile Indianrangko Africaona rimbaenga ine kansoe jahas gimikkon nisie galsona chingsoaha. Indaken uamang Jahasoni ong'onsrapgijan Gandhi aro uni kotokko bigil gipok manderang chagrime dokaha aro ro'ongrangchi gotataha. Bigil gipok me'chikma saksa re'bae jokatjaode uamang gimikkon sipile dokgnokchim. Jensalo British Colonial Secretary iani gimin knasoaha, ua denggu manderangko sasti on'china hukum on'aha. Indiba ka'sachakgipa Gandhi indake dakna on'jaha.

Africao dongmitingo Gandhini janggi tangani

dingtangna a'bachengaha. Ua ukil ong'e janggi tangna chol ong'genchimoba aro an'tangnasan janggi tange nama obostao janggi tangna man'genchimoba indiba hajalni hajal Indianskarang dukskime janggi tangna nangengon an'tangni maha dake janggi tanganiko ong'e nikjaha. Uni gimin ua man'e cha'gipa aro kangalrangni gisepo dingtanggrikatgijagipa aro pilakkon apsan gadango ong'atgipa janggi tanganiko on'gipa maiba gital janggi tanganiko bikotna ua nangnikaha. Indake ua Johanesburgni kilometer 34 mang chel'ao Ashram ge'sako dakaha. Uko ua mingsinggipa Russiani lekka segipa mande Leo Tolstoy ni bimungchi Tolstoy Ashram ine mingaha. Ia Ashramo donggipa manderang an'tangtangan song'a chana, rata teta, daka rika aro indake ma'manti kamrangko jaktangchin ka'na nangachim. Rongtal-an'talani kamrangkoba an'tangtangan dakna nangaha. Darangkoba nokkol dake jakkalgija mande sakan-tian apsan ong'a' ine indakgipa janggi tangani kamrangchi Gandhi a'gilsakna mesokna aro indakgipa janggi tanganiko janggitangchina Gandhi nangnikaha.

Africao donggipa Indiani manderang aro gipin bigil gisim manderang bilsisabatbat bilongbatroroe sinjetanirangko man'aha. Ua somoio Gandhini gritang Maganlal Gandhi kakket aro bebena okgimu chakna aro indakachi Sorkariko dakgrikna Sadag-raha ine bimung done gital silchidareko bikotna

chanchiaha. Gandhi iako namnikaha aro ua ja'mano uko Satyagraha ine bimung donskae India A'songni jakgitelanina ukon silchidare dake jakkale British Sorkari baksa dakgrikaha.

1907 bilsio Black Act ko Transvaalo ra'gataha. Iani ortoara pilak Indianrangan an'tangtangni bimungko Sorkarina see on'na nangachim. Ian uamangko chonnikbeani kamsa ong'achim. Gandhi iako jegalchina Indianskarangko didiaha, aro changgnina iani a'selan ua patok donako man'aha. Gandhiko ja'rikgipa Indiani manderang badita uamangko sinjeta inditan bilakbatroroe Sorkariko warachakaha. Sorkari warachakgipa Indianrangko amchakjawa ine ja'mano nikaha.

1914 ni January jao Gandhiko patokoniko wataha. General Smuts baksa nangrimgrikaniko dake uni mongsonggipa dabianirangko on'aha. Indake Gandhini krengdilanichi bigil gipok manderangni Indiani manderangko sinjetanirangoniko naljokatbana man'aha.

## RANTA KA'ANIRANG 32

### 1. Sing'anirang :

- (a) Gandhi basako aro bano atchiaha ?
- (b) Uni pagipa mai kamko ka'achim ?
- (c) Gandhi basako aro maina Englandchi re'angaha ?
- (d) Ua basako aro maina Africachi re'angaha ?

- (e) Ashramo maimai kamrangko daka aro uni miksonagni mai ?
- (f) Satyagraha badia kattaoni ong·kataha ?
2. Africao Indiani manderangko maidake jakkal-aha ?
3. Ia lessonko poraie Gandhi maidakgipa mande ong·a ine na·a chanchia ?
4. Bangbanggiparango kragipa kattarangko gapat-bo :
- (a) Gandhi \_ \_ \_ bilsini \_ \_ \_ tariko \_ \_ \_ songjinmao'atchiaha.
- (b) Ua \_ \_ \_ bilsio Englandchi \_ \_ \_ kamko skie ra·na re·angaha.
- (c) Gandhi Ashramko \_ \_ \_ Ashram minga-chim.
- (d) Gandhini gritangko \_ \_ \_ \_ minga.
- (e) Black Actko \_ \_ \_ bilsio \_ \_ \_ ra·gataha.

### LESSON 33

### BURUNG BOLGRIMNI GAMCHATA

---

Depante : (Salsao burung sambako dakgipa sorokko pagipa baksa re·angmitingo) Apa, ia

maikoba tino see bolo datkape dongipara  
maiko miksonga ?

Pagipa : Jojong, iara RESERVED FOREST ine  
see donenga ?

Depante : Uni ortoara mai, Apa ?

Pagipa : Uni ortoara, Sorkari ia burungko  
kangmanaha. Uni gimin darangba  
hukum gri skatang ianoniko bol wa'a  
den·na man·jawaha. Jean ia niamko  
manigija bol wa'a den·genchim, uamang  
niam gita sastiko man·gen.

Depante : Indiba apa, burung-bolgrimara mandena  
mai nambeako on·ani gimin uarangko  
indita ripingna nanga ?

Pagipa : Jojong, na'a bang·en uie ra·na nang-  
engkua. Burungrang a·ako ka·sinata. Uni  
gimin burung donggipa biaprango  
namen ka·sina. Burung donggipa biap-  
rango ka·sinani gimin mikkarangba  
wabata.

Depante : Apa, indake Garo Hillso burungrang  
dongangjaengahani giminsa da'o mikka-  
rang tik ong·e wajaengama ?

Pagipa : Oe jojong, uan kakket ! An·chingni  
A·songo bol wa·arang bon·angengahani  
gimin da'o mikkarang tik ong·e wajaeng-  
aha. Chirangkoba man·angjaengjok !  
Bol wa'a dongangjaengahani gimin

chiringrang aro chimikrang tipangeng-jok !

Depante : Indide apa, da'sio an'chingni nikbaa gita an'chingni a'brirang porongrong ong'ode basakba chasongode Garo Hillsde a'gisi pil'genkonde !

Pagipa : Oe, uan chingni kensoani ! Na'a India A'songni Thar Desert ba a'gisini gimin poraiman'enggnok. Skango Thar A'gisi-ba bolgrimrarasa ong'achimna ! Indiba manderang skatang bolrangko den'e ja'manode ua a'gisi pil'srangjok ! An'chingni manderangba skatang bolrangko den'e galode indide ruut-gijan Garo Hillsba a'gisi pil'gen. Uni gimin an'ching da'on simsaksona nanga.

Depante : Gipin a'songni manderanga bolrangko maikai rakkia ?

Pagipa : Gipin bigil gipokrangni songdonggipa a'songrangode uamang bolrangna namen ka'saa. Mandena jekai ka'saa indaken uamang bolrangnaba ka'saa. Uamang bol pang'sako den'ode gipin bol panggniko ge'e donskaa. Sorkarini kanggimin burungni bolrangko cha'ue den'ako nikode Japanese manderangde bichal gri slaichi goe galaia. Uandake



burungranko nosto ka'giparangna on'a. Indake dakachi uamang an'tangtangni burungranko name ripingna man'enga.

Depante : Iarangna agreba burungranga maina gamchata, apa ?

Pagipa : Burungrangni gamchata bang'en dongkuenga. Bolrang dongjaode mikka waon a'ani kosako donggipa a'salrangko chisring ra'e man'pakanga. Chisring ra'aniko champenggipa bolrang dongjani gimin a'arangko chi ra'rokangani gimin a'brirang aro a'dramrang be'a. Uni gimin indake a'salrang dongjani gimin uarango maibarangko ge'oba silna man'ja. Burung bolgrimrang dongode do'o matrang uno kusi ong'e katchae roa, aro indake burung namen an'senga. Da'o burungrang dongangjaengahani gimin sako rogipa do'orang aro a'o cha'amgipa matburungrang gimaangengaha. Uarangba burungni gamrangchim !

Depante : Apa, bolranga balwakoba on'akonde, mo ?

Pagipa : Oe jojong, bolrang an'chingna namgipa balwako on'a. Mandeni rang'sitgipa balwako Oxygen minga, aro bolrangni rang'sitgipako Carbondioxide minga.

Bolrang carbondioxide balwako rang'site oxygen balwako wate galskaa. Indake an'chingna rang'sitna gita namgipa balwako on'a.

Depante : Burung bolgrimrangara biaprangkoba nitoata aro an'sengata mo, apa ?

Pagipa : Oe jojong, burung bolgrimrang biapko an'sengatchongmota. Uarang biapko nitoata. Burung porongrong dakaigipa biaprang an'sengja. Uarango dongna aro chakna ampilgija ding'a.

Depante : Aiao ! Angade Garo Hillskode a'gisi ong'na on'na sikjawa. An'sengjawajok !

Pagipa : Indide na'a bolrangna ka'sana nanggen. Uaranko simsake ripingna nanggen. Burung bolgrim giani a'sel Garo Hills a'gisi pil'ode an'sengjawasan ong'jawa, indiba an'ching pilakan okkrie sigen ! Uan an'chingna akal karapkoba ra'bachongmotgen ! Burung bolgrimna an'ching ka'sajaode an'chingna pilak rokom daken gimaaniko ra'bagen ! Uni gimin na'a da'alo angni 'agangipa kattarangko gisik ra'jringbo.

### RANTA KA'ANIRANG 33

1. Sing'anirang :

(a) Reserved Forest-ni ortoara mai ?

- (b) Japan A·songo bol cha·ugiparango maikai sasti on'a ?
  - (c) Bolrang mandena mai balwako on'a ?
  - (d) Thar A·gisi maikai a·gisi pil·aha ?
  - (e) Gipin a·songrango bolrangna maikai ka·saa ?
2. Burung bolgrimni gamchatani gimin lessono pangchake nang'ni uia gita tale sebo.
  3. Burung bolgrimko simsake rakkijaode ja·mano Garo Hillsna mai namgija obosta ong'gen ?
  4. Bangbanggiparango katta jikserango gapatbo :
    - (a) Burung-\_\_\_\_\_ ; (b) Niam-\_\_\_\_\_ ;
    - (c) Chiring-\_\_\_\_\_ ; (d) A·bri-\_\_\_\_\_ ;
    - (e) \_\_\_\_\_-kanga ; (f) Ge'a-\_\_\_\_\_ ;
    - (g) Gam-\_\_\_\_\_ ; (h) A·sel-\_\_\_\_\_ ;
    - (i) Akal-\_\_\_\_\_

## LESSON 34

## CHU

Chu uni 'bimung kan·dikbea aro uno oikor minggittamsan dongaia ; indiba uan kanbegnigipa aro bisigrakgipa bostu ong'a. Uko ringo tosu tosu nika ; indiba ua mandeni'okningona napangon ua mandeni gnangrangko wa'al gita kama.

Skiaman·giparang chu ringna nanga ine mitamrang chanchia, aro ian chua nama gadango kam ka·giparangni dakna nangchongmotgipa ineba mitamrang agana. Ia indake agananirang pilakan dal'a gualani ong'a.

Chu ringe namako man·ana bate namgijako manderang bate man'a. Chu mandeko seng·gipa ong'atani pal batesa uamangko jinmani mikkango goka ong'ata. Chu peke manderang skatang kragija kattarangko jinmao agana aro kragija dakbewalrangko jinmana mesoka. Chu peke manderang ramarango goka dake re'a, aro ramasamni a·dubekrango wak gita tua. Chu ringe manderang cholonna ong·sigipa kamrangko ka'a, aro indakgipa kamrang nina misilani ong'a.

Chu ringe manderang nokko songko kajia dakronga. Chu ringgipa mandeni nokdang pangnaba tom·tomna man·ja. Ua jikko deko pangnan dokronga. Nokdangni nanganirangna chanchija, aro jikmung demungba noko·dongrongja. Bang'a chu ringgipa manderang jikna dena bate chunan ka·sabata aro chanchibata. Jikko deko ruuta salrangna nikjaoba on·tisaba ka·pakja; indiba chuko salsa ringna man·jajokode unan be·en dongsiksake re·joja. Chu ringgiparang bang'a salon noksulrangko skatang saia, aro indake kajia bota. Uamang an·tangtang skaska pangnan dakgrika. Basakoba songko nokko waljatchirango jinmarangni

tusiani somoio paglarang gita chrike a·boke golmal ka·a.

Chu mandeni gamrangko rusia. Chuna mande-rang skatang koros ka·a. Uandake nokdango jik deni cha·pagniko ong·gijana koros ka·e rusia. Chu ringgiparang mandeskanaba baté gro manga. Chu palgiparangnaba uamang bakki dakronga. Chu ringe manderang gamko rusiasan ong·aigija, nokdangkoba rusia.

Chu mandeni be·enkoba nosto ong·ata. Nitogipa arō chananggipa mandeba chu ringjringahaode be·en bimang ong·sianga. Uamangni be·enrang miltappoa, maina uamangni an·chirang be·enon chu gapahani gimin name kam ka·na man·ja. Uamangni knirang aro ku·simangrang gitchaksie sianga. Uamangni ja·dilirang siangani gimin uamang bilgria aro indaken uamangni be·enrang, ja·a aro jakrang til·tila. Uamang tom·tome chadengna aro sena man·ja. Uamangni taningrangkoba chu nosto ka·a. Uamango gisik ra·ani bilrang namen komia. Chu mandeni ka·prangkoba kama. Uandake chu ringrakgiparang ma·manti saanirangko man·e sininga.

Kosako agangimin gita chu mandeni gamko rusia, be·enko nosto ka·a aro nokdangko gimaataona sokata. Chu mandeko pagla dakata, gokani kamko ka·ata arq janggi tanganiko bakkandikata. Chu ringe manderang jik seka aro uandake ma·manti namgija kamrangko ka·a. Gisik seng·gipa manderang be·enni

mangrakanina aro an·senganina tangkako koros ka'a ; indiba mitamrang an·tangtangni gamni aro janggini gimaanina tangkako koros ka'a ! Na·ara badia dolo ja·mano ong·pagen ?

### RANTA KA·ANIRANG 34

#### 1. Sing·anirang :

- (a) Chu maidagipa bostu ong·a ?
- (b) Chu be·enna mai namgniko on·a ?
- (c) Chu mandeko namgipa ong·atama ?
- (d) Chu ringrakgiparang be·en an·sengama ?
- (e) Chu mandeko seng·gipa ong·atama ?

#### 2. Chu maimai namgijarangko mandena ra·baa nang·ni uia gita sebo.

#### 3. Bangbanggiparango katta jikserangko gapatbo :

- (a) Ringa- — — — — ; (b) Seng·gipa- — — — — ;
- (c) Nokdang- — — — — ; (d) — — — — -ja·dil ;
- (e) Dakgrik- — — — — ; (f) An·seng- — — — — .

8764.  
15.496  
Shu